


100

1105
241

30
8947



1001

皇清經解續編卷千四十一


南菁書院

詩地理徵三

嘉定朱右曾亮甫著

國風

鄭譜在
檜後



譜曰初宣王封母弟友於宗周畿內咸林之地是為鄭桓公今
京兆鄭縣是其都也為幽王大司徒甚得周衆與東土之人問
于史伯曰王室多故余懼及焉其何所可以逃死史伯曰其沛
洛河潁之間乎是其子男之國虢檜為大虢叔恃勢鄆仲恃險
皆有驕侈怠慢之心加之以貪冒君若以周難之故寄帑與賄
不敢不許是驕而貪必將背君君以成周之衆奉辭伐罪無不
克矣若克二邑鄆檜補丹依疇歷華君之土也桓公從之後三

年幽王爲犬戎所殺桓公死之其子武公與晉文侯定平王于東都卒取史伯所云十邑之地右洛左洧前華後河食溱洧焉今河南新鄭是也通鑑外紀曰宣王二十二年封季弟友于鄭都咸林括地志曰鄭故城在華州鄭縣西北三里地理志曰鄭國今河南之新鄭本高辛氏火正祝融之虛也及成皋滎陽潁川之密高陽城皆鄭分也

案此亦就六國初之鄭言之其實不止此也

自武公後二

十三世爲韓所滅帝王世紀曰或言縣故有熊氏之虛黃帝所都也郡縣志曰鄭州新鄭縣鄭武公之國都右曾案鄭縣本華州治明省縣入州今屬陝西同州府新鄭縣今屬河南開封府子曰鄭聲淫樂記曰鄭衛之音比于慢矣淫泆之聲使人意靡魄化志氣怠慢然言音言聲則非言詩矣夫聲音出乎虛

入乎虛故其發之也微其感人也深夫詩本於人心流於人口苟非寡廉鮮恥之尤甚者未有日宣淫詞而不惡耳聞淫謳而不怍者故聲音之與詩未可同日語也地理志曰鄭土陘而險山居谷汲男女亟聚會故其俗淫白虎通曰夫子謂鄭聲淫何鄭國人民山居谷浴男女錯雜爲鄭聲以相悅懌故邪僻聲皆淫色之聲也

趙岐孟子注曰王豹處淇水而夫河西善謳所謂鄭衛之聲也

天下未有俗淫而聲不淫者聲之淫俗爲之也未有政淫而俗不淫者俗之淫政爲之也而其終極則以聲之淫淫人之心而浸以成俗夫子謹其所感班固原其所繇其致一也樂記疏稱五經異義云今論說

今文家之論語說也

鄭俗有溱洧之水男女聚會謳歌相感故曰鄭聲淫左傳說頰手淫聲謂之鄭聲

者言煩手躑躅之聲使淫過矣謹案許君案也鄭詩三十一篇說

婦人者十九孔氏曰十字衍故鄭聲淫也以詩為聲蓋昉于此今三

家說不可知依毛詩義惟丰東門之墀溱洧三篇為淫詩耳

是其淫者七之一而不淫者七之六何以謂之淫聲抑鄭衛

三十九篇雄雉匏有苦葉新臺牆有茨君子偕老桑中鶉之

奔奔蟋蟀氓淫詩凡九篇則以鄭詩數去之其淫者又居三

之一矣而子獨放鄭聲何哉自許君以鄭詩為鄭聲于是說

鄭風者舉春秋名卿所賦以贈答者一切概目之為淫奔豈

知牀第之言不踰闕苟為男女褻嫺之詞奚忍出諸其口抑

不慮聞者之掩耳乎樂記曰鄭音好濫淫志宋音燕女溺志

齊音敖辟驕志衛音趨數煩志周禮凡建國禁其淫聲過聲

凶聲慢聲聲之與音對文則異散文則通未聞聲音之與詩

亦可通也詩可以觀若桑中溱洧諸詩正可以觀耳不然豈

子於為邦欲放之而刪定轉錄之邪吳氏曰齊詩刺哀姜而

季札曰泱泱乎大風也哉鄭美武公父子而札曰其細已甚

曰大曰細自其土地風氣之發於音聲者言之非繫乎辭也

班孟堅曰民性剛柔緩急音聲不同係水土之風氣此可謂

能知聲者矣

左傳子產言先君桓公與商人皆出自周與外傳寄孥之說

合桓公寄帑則武公當桓公之世已居鄆外傳言鄆由叔妘

公羊傳曰先鄭伯有通于鄆夫人者叔妘蓋即鄆夫人先鄭

伯謂武公也寄帑在幽王九年越年而幽王滅武公乃與晉

文侯共立平王卒滅虢鄭世家言桓公之時虢鄭獻十邑夫十邑者通虢鄭言之今以為虢鄭獻十邑且在桓公時俱與外傳抵牾不可信水經注稱竹書紀年晉文侯二年王子多父伐鄭克之乃居鄭父之邱是曰桓公然攷文侯二年為周幽王三年時桓公未為司徒未謀於史伯何遽滅鄭乎且既居鄭父之邱何以又死於幽王之難其謬顯然

祭

水經注長垣縣有祭城祭仲之邑右曾案左傳祭封人仲足杜預曰陳留長垣縣東北有祭城長垣今徙治蒲城屬直隸大名府故城在縣東北三十五里

括地志曰故祭城在鄭州管城縣東北十五里鄭大夫祭仲

邑案封人職守邊竟衛有儀封人宋有蕭封人呂封人皆邊邑也長垣為鄭衛錯壤之處故杜鄴竝以為祭仲邑若鄭州之祭則周祭伯國也

京

地理志河南郡京縣注師古曰即鄭其叔段所居括地志曰京縣故城在鄭州滎陽縣東南二十里鄭之京邑郡縣志曰京水出滎陽縣南平地

清

傳曰清邑也箋曰高克所帥衆之邑也郡國志曰河南中牟縣有清口水水經注曰清池水出清陽亭西南平地東北流逕清陽亭南東流即故清人城也清水又屈而北流至清口澤又北

注于渠水右曾案杜預曰滎陽中牟西有清陽亭潘岳都鄉碑云自中牟故縣以西西至于清溝即清池水也寰宇記曰清陽亭唐初置清池縣屬管州貞觀初廢故城在中牟縣西方輿紀要曰清池水今在中牟縣西南五十里北注丈八溝

彭消軸河上

傳曰彭衛之河上鄭之郊也消軸河上地正義曰衛竟亦至河南故曰衛之河上郊謂二國郊竟非近郊遠郊也碩鼠云適彼樂郊亦總謂竟為郊也久不得歸師有遷移三地亦不甚相遠故俱于河上右曾案彭後入衛為彌子瑕采地左傳彭封彌子是也其地未詳約當在今衛輝府延津滑二縣竟

水經注河水東過成皋縣北沛水從北來注之案縣與懷縣分河為界也右逕黃

馬坂北在今汜水縣西十五里又東逕旋門坂北在今汜水縣西南十里又東逕

成皋大伾山下成皋故城在伾上案在今汜水縣西一里西去洛口四十里又東逕板城

北有津謂之板城渚日案又東過滎陽縣北滎陽渠出焉案今在滎澤縣地

縣西四十里有石門渠即滎陽渠也又東北逕卷縣之扈亭北春秋盟于扈案在今原武縣西

北又東逕卷縣北晉楚之戰晉軍爭濟舟中之指可掬即處也案今原武縣西北七里有卷縣故城

又東北過武德縣東在今武陟縣東東至酸棗縣西左傳子奔晉及酸棗故城在

今延津縣北十五里河水又東北通謂之延津左傳廩延杜預曰在酸棗縣北案今汲縣南有

故延津城又逕東燕縣故城北河水于是有棘津之名東燕故城在故胙城縣東又東淇

水入焉又東右逕滑臺城北右曾案此下所敘已詳擲地東

燕滑臺故鄭衛錯壤處也

溱說文作潛又有溱水出桂陽臨武水經汝水注有溱水出平輿是鄭地之水當作潛溱非鄭水也然其字變從秦亦

已久矣

說文曰潛水出鄭國郡縣志曰溱水源出鄭州新鄭縣西北三十里右曾案水經注曰潛水出郟城西北雞絡塢下東南流逕郟城西又南懸流奔壑崩注丈餘積水成潭廣四十許步又南注于洧詩所謂潛與洧者也世亦謂之為郟水

洧

國語曰主芣驪而食潛洧

地理志密縣有大驪山

水經曰洧水出河南密

縣西南馬領山

地理志出陽城縣陽城山

又東南過其縣南又東過新鄭縣

南潛水從西北來注之

注曰黃水也經曰潛水非也案潛水又合洧在郟城西南故道元云非也

東南過長社縣北又東南過新汲縣東北又東南過茅城邑之

東北又東過習陽城西折入于潁

地理志洧水東南至長平入潁

括地志曰洧

水在新鄭縣北三里古新鄭城南與溱水合右曾案黃氏今水

經曰洧水源出密縣東至新鄭會溱水為雙洎河

齊

譜曰齊者古少昊氏之世爽鳩氏之虛周武王伐紂封太師呂

望于齊是謂齊太公地方百里都營邱成王用周公之法制廣

大邦國之竟而齊受上公之地更方五百里其封域東至于海

西至于河南至于穆陵北至于無棣在禹貢青州岱山之陰濰

淄之野其子丁公嗣位于王官後五世哀公政衰荒淫怠慢紀

侯譜之于周懿王使烹焉齊人變風始作史記齊世家曰胡公

徙都薄姑獻公徙治臨淄封禪書曰齊之所以為齊者以天齊

括地志曰薄姑在青州博昌縣東北六十里地理志曰齊郡臨淄

里天齊池在青州臨淄縣東南十五里詩地理徵三

縣師尙父所封王氏曰卽營邱也今青州西北四十里右曾案爾雅曰水出其左營邱孫炎曰今齊之營邱淄水過其南及東漢書注臣瓚曰臨淄卽營邱今齊之城內有邱卽營邱也水經注曰臨淄城中有邱淄水出其前經其左故有營邱之名括地志曰營邱在臨淄北百步外城中今青州府臨淄縣東北有古臨淄城

地理志北海郡營陵或曰營邱應劭曰師尙父封于營邱陵亦邱也臣瓚非之曰營陵春秋謂之緣陵兩說相岐紛如聚訟道元辨之曰營陵城南無水惟北有一水世謂之白狼水由爾雅出前左之文不得以爲營邱是也而愚更有六證也天齊淵在臨淄南郊山下齊之名國以此若在緣陵不得有

齊名一也以營陵爲營邱者徒以史記有營邱邊萊萊侯與之爭之說營陵去萊差近耳不知武王之世太公未嘗就國金滕言三公穆亦又言三公問諸史展喜對齊侯曰周公太公股肱周室成王勞之而賜之盟書大傳言太公報政與伯禽同時是太公就國在成王之世也安得如史記所云豈太公之見反出於逆旅主人下哉則此事全不足信二也班固於臨淄自注師尙父所封於營陵注或曰營邱或者疑辭姑存一說非可案據三也晏子春秋言先君太公築營之邱又言景公登牛山見後北臨其國城而流涕晏子曰使賢者守之則太公常守之矣此正指臨淄非營陵也四也韓詩外傳言景公登牛山而泣下晏子曰古無死者則太公丁公至春秋城緣陵今猶存君方將披蓑笠而立獻畝何暇念死乎

不言杞與城楚邱不言衛同例若本是齊都必有先公之廟
桓公即欲假仁市恩何至委宗廟於異國五也史記世家言
獻公自薄姑徙治臨淄而應劭云獻公自營邱徙此劭意謂
齊未嘗都薄姑邪抑謂薄姑亦號營邱邪又豈自薄姑復還
營陵自營陵徙臨淄邪支離之說不攻自破六也杜預釋例
不列營陵於齊地晉書載記慕容德如齊登營邱是亦明證
也同知是太公望國武王公孫也

烝民傳曰古者諸侯之居逼隘則王者遷其邑而定其居蓋
去薄姑遷于臨淄而史記則謂齊遷臨淄在夷王之世攷齊

世家云哀公時紀侯譖之周周烹哀公鄭譜謂懿王烹之據三代世表哀公當其

王世胡公當懿王世也徐廣謂夷王烹之據紀年夷王二年致諸侯烹齊哀公于鼎也而立其弟靜是

為胡公胡公徙薄姑當周夷王之時哀公同母少弟山殺胡

公而自立是為獻公獻公元年徙薄姑都治臨淄九年獻公

卒子武公壽立武公九年周厲王出奔鏡以周本紀校之厲

王三十七年出奔則獻公元年為厲王二十年萬斯同紀元彙攷亦云然

不得及夷王之末也或曰獻公九年當作二十九年或曰世家當周夷王時句當屬上讀然無

論其遷於何時而其城齊必在宣王之世者則自有說臨淄

本是齊都豈無城郭其居薄姑僅胡公一世耳繕完葺治何

俟蒞以王朝之卿士以世家攷之乃是定齊之亂也世家云

武公二十四年周宣王初立二十六年武公卒子厲公無忌

立厲公暴虐故胡公子復入齊齊人欲立之乃與攻殺厲公

胡公子亦戰死齊人乃立厲公子赤是為文公年表厲公九

年宣王之十二年也其不曰平亂而曰城齊者為宣王諱也
傳則原其始而言之非謂齊至是始遷也詩曰不侮矜寡不
畏疆禦又曰衮職

有闕維仲山甫補之
則已見於言外矣

釋文云崔集注本作嶷案地理志作嶷注
曰山名字或作嶷亦作嶷水經注作嶷

傳曰山名說文曰嶷山在齊右曾案隋地理志曰北海郡益都
縣有嶷山方輿紀要曰嶷山在臨淄縣南十五里

地理志曰臨菑名營邱故齊詩云子之營兮注云毛詩作還

案班氏習魯詩此蓋魯詩之說師古以為齊詩釋文云還韓

詩作嶷嶷好貌又案如魯詩說則是詩之作在胡公時矣不

然何不云齊而云營也呂氏讀詩記引崔靈恩三家詩集注
云營茂昌皆地名案地理志琅邪郡

有昌縣紀要青州府諸城縣東北二十五里有昌縣故城又
安邱縣西南有牟鄉城又案前書表田廣明封昌水侯在於

陵趙世家攻齊昌
城即漢昌國縣

地理志又曰煨我乎著乎而師古曰著地

名沛南著縣右曾案史記曹參戰沛北攻著漢書曹參收著

漯陰即此著也北齊省廢余沛南府臨邑縣東南五十里有

故著城此亦魯詩之說與毛不合故不別標名改附此

南山齊書地理志曰南山在臨淄縣南

傳曰齊南山也右曾案即牛山也劉昭稱孟子注曰齊南小山

曰牛山左思齊都賦曰牛嶺鎮其南水經注曰天齊水出南郊

山下在今臨淄縣南十里說文齊水出南山

魯道水經注曰汶水南逕鉅平縣故城東西南流城東有魯道詩所

謂魯道有蕩今汶上夾水有文姜臺右曾案括地志曰鉅平城

是齊至鉅平

今為故城社汶水逕其東其東南即魯之成邑方輿紀要曰兗州府甯陽縣東北九十里甯平城西南甯城東南甯陽縣

案甯陽縣在兗州府北五十里泰安府西南百有五里齊魯

之通衢大道也齊子由歸在春秋桓公三年經曰九月齊侯

釐送姜氏于謹公會齊侯于謹夫人姜氏至自齊是其事也

載驅詩曰魯道有蕩齊子發夕傳曰諸侯之路車有朱革之

質而羽飾發夕自夕發至旦箋曰汶水之上蓋有鄒焉襄公

與文姜時所會致春秋經莊公元年三月夫人孫于齊二年

冬十有二月夫人姜氏會齊侯于禚杜預曰齊地左傳定九年齊侯致禚嬀杏于衛

則為齊衛接界之地四年春王二月夫人姜氏享齊侯于祝邱地形志泰山鉅

平縣有祝邱城非漢東海之即邱也五年夏夫人姜氏如齊師七年春夫人姜

氏會齊侯于防地形志鉅平縣有防城陽關城冬夫人姜氏會齊侯于穀齊地

今東阿縣胡氏春秋傳曰如齊師傳齊詩載驅刺襄公盛其車服疾驅

于通道大都與文姜淫之詩也其三章曰行人彭彭彭彭者

多貌也其四章曰行人儻儻儻儻衆貌也曰會曰享猶為之

名也如齊師則羞惡之心亡矣蓋以載驅所詠為莊五年夏

之事也以愚攷之殆四年及七年春之事耳左傳於會禚曰

書姦也於會防曰齊志也杜預曰書姦姦發夫人齊志出於

齊侯之意傳舉二端則其餘皆從之夫禚齊地往而會齊侯

故知姦發夫人則如齊師會穀可知矣防魯地來而與文姜

會故曰齊志則祝邱可知矣載驅之詩明是齊志况祝邱防

魯道汶水俱在鉅平故曰詩所詠為莊四年及七年春之事

也正義以祝邱為姦從夫人穀為齊志非是

南山之詩其作於魯桓公十八年公既死之時乎首章刺襄

公故以雄狐起興傳訓懷為思是刺襄公也箋訓來二章刺

文姜也葛屨服之賤者則既兩矣冠綏服之尊者亦雙止矣

言五兩庶民多國止無貴無賤各有配偶箋曰葛屨五兩喻

一君一妃故以冠喻襄公五人為奇彼齊子既有配偶矣曷又從襄

同處冠綏喻襄公亦是曲說夫為妻綱故易著閑家之訓桓公不聽申繻之諫而受制於

公而為淫也箋云襄公送而從之在桓公時無此事若雖然

一婦人宜其死也故下二章又刺魯桓也

汶水

地理志曰汶水出泰山萊蕪縣原山西南入泲桑欽說右曾案

水經注曰汶水出泰山萊蕪縣原山括地志山在淄川縣東南七十里西南流

逕羸縣故城南在今萊蕪縣西北又西南逕奉高縣北在今泰安縣東屬從縣

西南流又西南逕徂來山在泰安縣東南四十里又南逕博縣故城東

在泰安縣東南又西南逕亭亭山在泰安縣南五十里又西南逕陽關故城西

在泰安縣西南又南逕鉅平縣故城東而西南流又西南逕魯

國汶陽縣故城北郡縣志曰汶陽故城在兗州龔邱縣東北五十四里龔邱今甯陽也又西逕蛇

邱縣南在肥城縣南蛇邱西南有又西南逕剛縣北在甯陽縣東北三十

五里元人於此又西南逕東平章縣南在今東平州東七十里又西南逕

築壩過汶入運在今汶上縣東北四十里又西南逕壽張縣北在東平州西南又西

南至安民亭今安山鎮而入于泲泲水出於汶水背汶而南

魏

譜曰魏者虞舜夏禹所都之地在禹貢冀州雷首之北析城之
西周以封同姓焉其封城南枕河曲北涉汶水昔舜耕于厯山
陶于河濱禹菲飲食而致孝乎鬼神惡衣服而致美乎黻冕卑
宮室而盡力乎溝洫此以一帝一王儉約之化于時猶存及今
魏君嗇且褊急不務廣修德于民教以義方其與秦晉鄰國日
見侵削國人憂之當周平桓之世魏之變風始作至春秋魯閔
公元年晉獻公竟滅之以其地賜大夫畢萬自爾而後晉有魏
氏地理志曰魏國姬姓也在晉之南河曲又云河東郡河北縣
詩魏國郡縣志曰魏城在陝州芮城縣北五里有晉案芮城縣
今屬山西解州
郡縣志曰河中府春秋時為魏地輿地廣記曰河中府永樂

縣古魏國漢河北縣唐分芮城置永樂案唐河中府治河東
縣即今蒲州府治永濟縣也永樂故城在今永濟縣東南百
二十里又南即芮城縣也又今榮河縣在蒲州府北百二十
里縣北十二里有汾水蓋魏國之竟狹而脩也

汾

地理志曰汾水出太原郡汾陽縣北山山海經汾出上麻北說
交出晉陽山水經出汾

陽縣北西南至汾陰入河括地志曰汾出嵐州靜樂縣北管涔
山郡縣志曰汾水北去寶鼎縣二十五里有晉案靜樂縣今屬

太原府管涔山在縣北百四十里寶鼎縣宋改榮河今屬蒲州
府汾水在縣北十二里西注於河縣處河汾二水之交也

服虔曰魏在晉之蒲坂與班氏異蓋蒲坂亦魏地耳孟康曰

晉文公以蒲賂秦秦反蒲于魏魏人喜曰蒲反矣故曰蒲反
案左傳晉使魏壽餘僞以魏叛者以誘士會秦伯師於河西
魏人在東士會既濟魏人譟而還診其地望應在蒲坂故曰
河西河東此疑卽孟康之所本亦可見蒲坂之爲魏地矣蒲
坂北接汾陰縣界汾陰有后土祠漢武帝所立
在睢上亦曰魏睢元朔六年得鼎于魏睢后土祠旁是睢亦魏地故唐人
睢上祠碑云故魏晉葵邱之地漢家后土之祠是也譜言魏
竟北涉汾水正義曰其竟踰汾放水經注汾水西逕耿鄉城
北杜預曰平陽皮氏縣東南耿鄉是也汾水又西逕皮氏縣
南又西至汾陰縣北西注于河皮氏故城在今河津縣西二
里古耿城在河津縣東南十二里自河津縣西南至滎河縣

九十里河津爲耿地則魏竟不得踰汾矣班固引詩但稱汾
一曲之句此最精於地理一曲者汾入河之處稍折而西南
自南望之爲汾曲也通鑑周建德中伐齊諸將以汾曲成小
山平欲進兵於此旣而謀取晉州反軍於汾曲王氏曰自滎
河以西皆汾曲也故魏詩之汾祇在滎河之境以上不得通
也

山海經沮洳之山郭璞注引詩彼沮洳未詳當攷

十畝之間

水經注曰故魏國城南西二面並去大河可二十餘里北去
首山十許里處河山之閒土地迫隘故魏風著十畝之詩右
曾案譜言舜禹故都皆在魏竟舜都蒲坂已見於上禹都安

邑在魏東北百四十里大都魏地隨河勢邪曲郇瑕氏故虛在其北故知

不方也截長補短應不減百里之方但其地境瘠多山故民俗

儉嗇非必地陜人稠也碩鼠之詩民方將適彼樂郊何至無

所容乎孟子曰五畝之宅樹之以桑漢書食貨志曰田中不

得有樹用妨五穀詩言桑者明是中田廬舍之旁采桑來往

不得如疏申箋義所云一夫不能百畝纔是十畝之間也毛

詩篇義但云十畝之間刺時也傳曰閑閑然男女無別往來

之貌或行來者或來還者泄泄多人之貌詳傳之意乃是刺

國無政使男女無別如樂府羅敷行之類耳自續序言其國

削小民無所居箋曲徇序疏又曲徇箋遂云民之所便雖田

亦樹桑不知去古則遠人情則近女有餘帛不將農歎斯飢

邪

河之干

傳曰干厓也右曾案水經注云河水出龍門口河在河津縣西二十五里

水從東來注之又南逕梁山原東在今韓城縣西北又南逕汾陰縣西

又逕邵陽縣東故城在今縣東四十里又南逕陶城西在今蒲州府南對北三十里

蒲津關在府西門外又南過蒲坂縣西在府東南五里又南逕雷首山西臨

大河北去蒲坂三十里後入於晉唐風所云首陽也又南歷船司空與渭水會在今華陰縣東北

又南歷潼關屈而東北流又東逕閭鄉城北郡縣志曰河水在永樂縣南二里

又東過河北縣南東逕芮城芮伯萬出居于魏是其故畫又東逕湖縣故城

北城在閭鄉縣東四十里又東過陝縣北北對茅城故茅戎邑也然則河

自會汾以南至於茅津以西其東岸北岸當俱是魏地

唐

譜曰唐者帝堯舊都之地今日太原晉陽堯始居此後乃徙河東平陽成王封母弟叔虞于堯之故虛曰唐侯南有晉水至子變改爲晉侯其封域在禹貢冀州太行恆山之西太原太岳之野至曾孫成侯南徙居曲沃近平陽焉昔堯之末洪水九年下民其咨萬國不粒於時殺禮以救艱厄其流乃被于今當共和之時成侯曾孫僖侯甚嗇愛物儉不中禮國人閔之唐之變風始作其孫穆侯又徙于絳云正義曰地理志云太原晉陽縣故詩唐國晉水所出東入汾河東平陽縣應劭曰堯都也皇甫謐曰堯爲天子都平陽禹受舜禪都平陽或于安邑或于晉陽夏都亦在晉竟故左傳云命以唐誥而封于夏虛是也地理志

曰唐有晉水叔虞子變爲晉侯又云河東郡聞喜縣故曲沃也晉成侯自晉陽徙此又云絳縣晉武公自曲沃徙此以桓叔別封曲沃武公既并晉國徙就晉都非謂武公始都絳也左傳云曲沃莊伯伐翼杜預云翼在平陽絳邑縣東穆侯徙絳昭侯以下又徙於翼及武公并晉又都絳也右曾案括地志曰故唐城在并州晉陽縣北二里夏后孔甲別封劉累之孫于大夏之虛爲唐侯及周成王時唐人作亂滅之以封太叔國語董因曰歲在大火唐叔以封是也史記世家曰唐在河汾之東方百里

東字
誤當作閒 此就始封時言之也又曰西有河西與秦接竟北邊

翟東至河內晉語曰景霍以爲城 山海經景山北望鹽販之澤南望少澤寰宇記景山在聞

喜縣東南韋昭以汾河涑澮以爲淵此就獻公以後言之也唐景霍爲一山非是

改爲晉在康王之時而詩不曰晉可見康王以前已采得唐國之風而後之太師因而不改謂成康昭穆之世無風者謬也

謂本其風俗故云唐則衛風何不云殷魏風何不云虞夏乎晉陽縣今太原府太原縣也曲

沃故城在今絳州聞喜縣東絳在今平陽府太平縣南二十五

里古晉城是也翼在今平陽府翼城縣東南十五里

唐之得名以堯虛晉之得名以晉水唐叔封晉陽賈服班鄭

無異說至皇甫謐則云堯都平陽于詩爲唐國見正義而張守

節祖之臣瓚謂唐今河東郡去晉四百里又云堯居唐東于

彘十里括地志謂絳州翼城縣西二十里唐城堯裔子所封

近世顧氏左傳補正祖之紛紛異說請一一辨之地理志於

平陽下不言故唐國應劭曰縣在平河之陽水經注曰平水

出平陽縣西壺口山東逕平陽城南東入汾俗以爲晉水非

也通鑑前編曰平水一名晉水此正俗之所名左傳趙朔爲

平陽大夫趙鞅入于晉陽以叛截然兩地不得以平陽爲晉

陽也既無晉水安得爲晉之所都則謚說非也霍爲文昭武

王時封至春秋閔公元年始滅於晉地理志曰河東彘縣故

霍國唐霍豈竝處一二十里之間乎且去晉四百里何取乎

晉之名以名其國乎則瓚說非也翼城之唐漢人無言之者

卽道元博極羣籍而滄汾注中曾不一及爲此說者祇見左

傳有成王滅唐而封太叔之語而是時之晉都於絳沃新田

以爲前世遷都亦必不遠不自知其鑿空無據也則括地志

之說非也顧氏補正曰翼絳北距晉陽七百餘里卽後世遷

國遠不相及况霍山以北皆戎狄之地自悼公以後始開縣
 邑又據世家唐在河汾之東一語謂翼城正在二水之東而
 晉陽在汾水西不合此尤目不見睫之論也杞遷東國許遷
 容城楚遷壽春或千餘里或七八百里何云遠不相及晉封
 太原逼近戎狄故祝鮀述唐叔之封曰疆以戎索然當成康
 之世周道邳隆狄亦不能為患故詹桓伯曰肅慎燕亳吾北
 土也燕亳即燕京春秋襄公十年同盟于亳城北公羊作京
 城北形相似而譌也後漢書西羌傳王季伐燕京之戎
 十三州志汾水出雁門武周官職方氏并州澤藪曰昭餘祁
 州縣之燕京山即其地也地理志曰太原鄆縣九澤在北并州藪則晉陽正在并州之
 域安得謂皆戎狄之地乎成侯徙都計其時蓋當穆王共王
 之世是時周道始衰徐戎侵洛翟人侵畢畿輔近地猶有戎

狄之轍而况太原成侯之徙有由然也顧氏乃以春秋之時
 勢上例宗周之盛何哉史記正義引世本唐叔居鄂宋忠曰
 鄂在大夏括地志曰故鄂城在慈州昌甯縣東二里然封於
 河汾二水之東正合在晉州平陽縣張守節以平陽為唐誠
 誤然足證史記東字之譌何則水經言汾水過平陽縣東郡
 縣志言平陽縣東有汾水則平陽故城亦在汾西河東今平陽府
 理臨汾縣治白馬而張氏案文定義云正在此可見史記及
 城則在汾水東矣唐風疏引否則云
 正義兩東字原本竝作閒字今傳刻訛耳此亦作東
 唐在汾東於義已足何必言河顧氏之辨亦未之思也

水經曰晉水出太原晉陽縣西懸甕山注曰地道記及十三
 州志並云出龍山一
 云出結繩山在縣西北又東過其縣南又東入于汾水徐才
 非也今在縣之西南

宗國都城記

見史記正義

曰燮父居晉水旁蓋即漢晉陽縣矣地

理志曰河東土地平易有鹽鐵之饒本唐堯所居詩風唐魏

之國是也其民有先王遺教君子深思小人儉陋

王氏稱諸侯譜曰晉穆侯遷都于絳孝侯改絳為翼獻公又

命曰絳景公遷于新田案杜預土地名絳今絳邑縣翼今絳

邑東有翼城郡國志補注曰翼在絳邑縣東八十里是翼非

即絳也蓋昭侯為潘父所殺孝侯既誅潘父心畏桓叔之強

東徙於翼至武公又自曲沃徙絳獻公城之左傳漢書可據

非獻公復改翼為絳也

沃

傳曰沃曲沃也水經注曰左邑縣故城故曲沃也涑水自城西

注水流急濬故詩人以為激揚之水曹氏曰自桓叔封曲沃至

武公滅晉凡六十七歲右曾案左邑故城在今絳州聞喜縣東

漢書武帝元鼎六年將幸緱氏至左邑桐鄉聞南越破以為

聞喜縣是聞喜縣治乃故左邑之桐鄉也應劭曰聞喜今曲

沃也秦改為左邑郡國志劉昭注曲沃在縣東北數里與晉

相去六七百里見毛詩譜注

此注未詳何人所作

據此是聞喜亦古曲

沃地而曲沃故城乃即左邑廢縣也地理志左邑聞喜並屬

河東郡國志無左邑縣詳應氏之說似東漢罷左邑而以聞

喜治之班氏但據見在縣邑書之故不係曲沃於左邑而係

之聞喜也桐鄉故城在今平陽府曲沃縣西南四十五里接

聞喜縣界

葵邱之五命曰無有封而不告趙岐注曰無以私恩擅有封賞疏謂如楚取彭城以封魚石是也左傳晉滅偃陽以予向戌向戌辭曰是臣勤諸侯以自封也史記楚昭王將以書社七百封孔子是國與邑可通言封也左傳封桓叔於曲沃亦祇賜之以邑耳但大都耦國禍亂之基故師服曰晉甸侯也而建國本既弱矣言晉祇甸侯而成師在沃儼然敵國能無亂乎乃孔氏正義遽倡爲沃國之說椒聊疏曰桓叔別封于沃自是鄰國相陵安得責其不臣違義害經莫此爲甚

鵠

傳曰曲沃邑也正義曰曲沃旁更有邑右曾案水經注曰左邑故曲沃詩所謂從子于鵠者也則鵠沃爲一地李廷寶曲沃辨

云今沃南十里有安鵠村卽古鵠邑則在今曲沃縣也未知孰是

首陽

正義曰首陽之山河東蒲坂縣南馬融曰華山之北河曲之中水經注曰雷首山臨大河北去蒲坂三十里郡縣志曰在河中府河東縣南十五里輿地廣記曰在永樂縣北三十里右曾案此本魏國之山春秋閔公元年晉滅魏僖公五年冬十二月晉獻公信驪姬之讒殺其世子申生於是公子重耳奔蒲夷吾奔屈父子之親而讒言行焉國人懼矣此詩儻作於此時與山在今蒲州府東南三十里

秦

詩地理微三

譜曰秦者隴西谷名于禹貢近雍州鳥鼠之山堯時有伯翳者
實皋陶之子佐禹治水水土既平舜命作虞官掌上下草木鳥
獸賜姓曰嬴歷夏商興衰亦世有人焉周孝王使其末孫非子
養馬于汧渭之間孝王爲伯翳能知禽獸之言子孫不絕故封
非子爲附庸邑之于秦谷至曾孫秦仲宣王又命作大夫始有
車馬禮樂侍御之好國人美之秦之變風始作秦仲之孫襄公
平王之初興兵討西戎以救周平王東遷王城乃以岐豐之地
賜之始列爲諸侯遂橫有周西都宗周畿內八百里之地其封
域東至迤山在荆岐終南惇物之野至元孫德公又徙于雍云
正義曰伯翳伯益聲轉字異一人也秦本紀云大業生大費是
爲伯翳列女傳云臯子生五歲而佐禹曹大家注云臯陶子伯

益也然則臯陶大業一人也中候苗興云臯陶之苗爲秦是也
中潏以來世保西垂常有國土非子分其國地別爲附庸地理
志曰非子邑于秦隴西秦亭秦谷是也史記曰厲王無道西戎
滅犬邱大雒之族秦仲之子莊公伐西戎破之并得大雒之地
文公元年襄公居西垂宮三年冬居汧渭之間甯公二年
徙居平陽德公甯公子元年初居雍獻公徙櫟陽孝公居咸陽
世紀云襄公徙汧括地志曰秦州清水縣本名秦通典曰秦州
文公還居犬邱古西戎之地秦始封之邑輿地廣記曰秦州隴城縣有秦谷右
曾案徐廣曰天水隴西縣有秦亭今秦州清水縣西南二十五
里故秦城是也括地志曰西犬邱在秦州上邽縣西南九十里
今秦州西南百二十里有西縣故城古西垂也襄公居汧括地

志曰隴州汧源縣東南三里有汧城汧源明省入隴州今屬鳳翔府西距秦州二百五十里平陽故城在今郿縣西四十六里雍故城在今鳳翔府鳳翔縣南七里櫟陽故城在今西安府臨潼縣北三十里咸陽故城在今縣東三十里

康成曰邾滕紀莒之等以其國小蔑而不錄其詩信如此言又安得有附庸之詩哉夫檜爲子男之國見於國語而儼列於風秦仲爲附庸之君而車鄰儼登於什可知西周之世無國無風矣且今僅以車鄰爲秦仲詩者毛詩說耳服子慎左傳解云秦仲始有車馬禮樂之好侍御之臣戎車四牡田狩之事其孫襄公列爲秦伯故兼葭蒼蒼之歌終南之詩追錄先人車鄰駟騶小戎之歌與諸夏同風故曰夏聲依此則駟

騶小戎亦秦仲之詩矣疏引鄭語以證秦之國大於邾莒夫桓公訪於史伯在幽王九年秦仲之卒在宣王六年秦仲既卒其子莊公伐西戎并得大維之地故史伯云國大而有德者近興秦仲齊侯姜嬴之傳也且大其將興乎姜嬴之傳原其先人之有德且大言莊襄之屬國豈謂秦仲之國已大乎董子曰附庸方三十里者字方二十里者名秦仲以字配國正猶之邾儀父蕭叔之類耳

地理志曰天水隴西山多林木民以板爲室屋及安定北地秦上郡西河皆迫近戎狄修戰備高上氣力以射獵爲先漢則與六郡良家子選給羽林期門以材力爲官名將多出焉

傳曰陂者曰阪正義曰李巡云陂者謂高峯山陂曹氏曰說文阪山脊也地理志隴西有隴坻在其西注隴阪也卽今隴山三秦記其阪九迴欲上者七日乃越高處東望秦川然則阪固秦地之所有也右曾案水經注曰秦水出大隴山秦谷西歷秦川有故秦亭秦仲所封也又西南注清水郡縣志曰秦州清水縣有小隴山一名隴坻方輿紀要曰隴州隴山在西北六十里小隴山在西八十里路通臨鞏爲秦屬要害

西戎與秦中齊對漢書卷一百一十五大宛傳與西戎對漢書匈奴傳秦襄公伐戎至邽始列爲諸侯右曾案西戎大戎昆夷一也本在塞外爲荒服屬宣以後入居中國幽王之末散處岐豐襄公攘之故云伐戎至邽詳小雅昆夷西戎

終南

傳曰周之名山中南也左傳曰中南九州之險也地理志曰右扶風武功縣東有太一山古文以爲終南關中記曰中南言在天之中居都之南也郡縣志曰南山東抵陝虢西接岐州長安志曰終南橫互關中南面西起秦隴東徹藍田相距八百里右曾案襄公居汧在今隴州終南首起於此故以托輿班志言在武功者指其主山也武功故城在鳳翔府郿縣東四十里

鄭譜言襄公遂橫有周西都畿內八百里之地而史記秦本紀言平王封襄公爲諸侯賜之岐山以西之地其子文公遂收周餘民有之地至岐岐以東獻之周案本紀是也甯公二年魯隱八年遣兵伐蕩社括地志雍州三原縣有湯陵三年與亳戰亳奔戎遂

滅蕩社十二年伐蕩氏取之武公元年魯桓十五年伐彭戲氏卽彭

衙至華山下十年伐邾冀戎初縣之地理志隴西有上邾縣天水有冀縣十一

年初縣杜鄭京兆有杜縣鄭縣滅小虢德公元年居雍城卜居雍後

子孫飲馬於河是德公之世竟尙未至於河曾謂襄公遽有

周都八百里之地哉秦孝公令曰穆公東平晉亂以河爲界

李斯諫逐客書曰穆公并國二十遂霸西戎是東地至於河

者穆公也平王東遷之後有黍離之詩是東西都聲問未嘗

絕也鄭徒見終南之詠大夫之戒襄公者已引終南爲喻遂

謂襄公亦得岐東今攷昔人言山之太者太行而外莫如終

南史記曰秦嶺天下之大阻也漢書東方朔傳曰南山出玉

石金銀銅鐵豫章檀栢又有秔稻梨栗桑麻竹箭之饒後漢

書曰赤眉大掠長安乃引而西自南山轉掠城邑入安定北

地括地志曰終南南山橋山楚山秦山周南山地肺山凡有

六七名郡縣志曰南山谷之大者有五斜谷鳳翔府郿縣西南三十里卽褒斜道

駱谷西安府盩厔縣西南百二十里卽儻駱道也子午谷在長安縣西南百里王莽通子午道卽此藍

田谷在縣東南路通洛古嶢關也衡嶺谷亦在藍田縣是也郿縣斜谷正值岐

山斜谷之西又有箕谷三國志諸葛亮伐魏揚聲由斜谷道

趨郿而使趙雲鄧芝據箕谷在今鳳翔府寶雞縣東南四十

里則在岐山之西矣柳宗元曰終南據天之中在都之南西至于褒斜又西至于隴首以臨于戎東

至于商顏又東至于太華以要之自西抵東綿互不絕實皆

之與山何必豐鎬之閒始爲南山哉

再紀崑崙山五嶽曰山基也曹氏曰崑崙崑崙山也

詩地理徵三

傳曰基也正義曰山基也曹氏曰崔靈恩集注本作岷曰終南之旁有岷山豐融之巖嶽為南山嶺

堂

千關墓非此國以無王屋
于蒲陽入東至平大華以
要之自西遊東歸以不誠實

傳曰堂畢道平如堂也箋曰畢終南之道名邊如堂之牆然正

義曰釋邱云畢堂牆李巡云堂牆各崖似堂牆曰畢郭璞曰今

終南山道名畢其邊若堂之牆郡縣志曰畢原在京兆府萬年

縣西南二十八里寰宇記曰堂即畢原也右曾案堂以崖高如

牆為義亦以高平為義故曰道平如堂箋亦曰畢也堂也亦高

大之山所宜有也今鳳翔府竟渭水之南有方山原隴州西南
二百里

和尙原寶雞縣西南
三十五里八角原寶雞縣東
南三十里五丈原郿縣西
三十里皆平如

堂者也亦曰大原

渭陽

箋曰秦時都雒至渭陽者蓋東行送舅氏于咸陽之地正義曰

晉在秦東地理志曰右扶風渭城縣故咸陽也其地在渭水之

北郡縣志曰京兆府咸陽縣渭水在南三里秦咸陽故城在今

縣東二十二里右曾案知在咸陽者咸陽在渭北涇南自雒至

此必渡涇而東至於蒲津春秋晉伐秦濟涇而次亦此地也

正義曰雒在渭南東行必渡渭誤也水經注云雍水出雍山

東南流逕秦惠公所居祈年宮東又東逕召亭南又東南與

橫水合又南逕美陽縣西又南流注于渭雍山在今鳳翔縣

西北三十里祈年宮亦曰橐泉宮今鳳翔府治也其南七里

為故大鄭宮城即秦所都也美陽故城在今武功縣西北二

十五里雍水出雍而東南入渭則雍在渭北矣方輿紀要曰岐山縣在府東五十里渭水在南三十五里自寶雞縣縣在府西南九里東流入境則渭逕雍南而不入其竟明矣

陳

譜曰陳者大皞虛戲氏之虛帝舜之胄有虞闕父者爲周武王陶正武王賴其利器用與其神明之後封其子媯滿于陳都于宛邱之側是曰陳胡公以備三恪媯以元女太姬其封域在禹貢豫州之東其地廣平無名山大澤西望外方東不及明豬太姬無子好巫覡禱祈鬼神歌舞之樂民俗化而爲之五世至幽公當厲王時政衰大夫淫荒所爲無度國人傷而刺之陳之變風作矣正義云案樂記陳與薊祝共爲三恪杞宋別爲二王之

後地理志曰淮陽國陳縣故陳國舜後胡公所封也又曰太姬婦人尊貴好祭祀用巫故其俗尙巫鬼通典曰陳州宛邱縣古陳國都右魯案水經注曰陳城東北三十許里猶有義城實中通典曰神農都陳左傳曰實德于遂遂世守之及胡公不淫是胡公爲遂之支裔也地理志但言大姬好祭祀用巫匡衡疏亦云陳夫人好巫而民淫祀不言無子左傳云陳我周之自出至于今是賴是太姬有子也陳縣今爲陳州府治淮甯縣也

宛邱

傳曰四方高中央下曰宛邱正義曰釋邱云宛中宛邱言其中央宛宛然是爲四方高中央下也郭璞曰宛邱謂中央隆峻狀如負一邱矣案爾雅上文備說邱形有左高右高前高後高若

此宛邱中央隆峻言中央高矣何以變言宛中故李巡孫炎皆取此傳爲說爾雅曰陳有宛邱注曰今陳郡陳縣水經注曰宛邱在陳城南道東王隱云漸欲平今無處矣王氏曰今陳州城在古陳城內西北隅陳都在宛邱之側

案爾雅云宛中宛邱又云邱上有邱曰宛邱陳有宛邱此郭氏所以訓宛中爲中央高峻也夫毛公之時宛邱無恙此必目驗知之李巡孫炎亦前於郭氏而從毛傳則其邱可知王隱與郭氏相去不遠云漸欲平意璞或以漸平者不足爲名邱別指陳地之邱以爲宛邱故顯違毛訓乎至於後魏酈氏遂謂今無處矣則後世之所謂宛邱如郡縣志云在陳州宛邱縣南三里輿地廣記云邱上有邱今其地形則然寰宇記

云在宛邱縣南三里高二丈皆非詩之宛邱也

東門之池

水經注曰陳城東門內有池池水東西七十步南北八十許步水至清潔而不耗竭不生魚草水中有故臺處詩所謂東門之池也郡縣志曰東門池在陳州城東門內道南右曾案據此則正義謂在東門外者非也

墓門

傳曰墓門之道右曾案古者族葬晉之九京魯之闕公氏是也陳則未詳序曰刺陳佗也左傳桓五年文公子佗殺桓公太子免而代立經六年蔡人殺陳佗公羊傳曰淫于蔡蔡人殺之左傳云陳厲公蔡出也故蔡人殺五父而立之則佗卽五父厲公

則桓公之子躍也史記謂佗與五父爲二人以厲公爲佗以躍爲利公又謂厲公立七年如蔡淫而蔡人殺之果爾則春秋不應書爲陳佗矣詩序亦當云刺厲公矣是則遷之誤也
墓門之詩蓋刺佗之淫佚楚詞天問何繁鳥萃棘負子肆情王逸注云解居父聘吳過陳之墓門見婦人負其子欲與之淫佚婦人引詩刺之曰墓門有棘有鴟萃止列女傳陳辨女者陳國采桑之女也爲歌曰墓門有棘墓門有梅云云攷吳之通于上國在魯成公之世而陳佗在魯莊之時詩本刺佗之淫而辨女卽歌以刺居父其義正同也
防邛

傳曰防邑也邛邱也郡國志陳國陳縣劉昭稱博物記曰邛地在縣北防亭在焉

株林

傳曰株林夏氏邑也正義曰邑在國外劉昭郡國志補注曰陳有株邑蓋朱襄之地右曾案詩云朝食于株計其邑必近國今亡其處或曰西華縣有夏亭城去縣三十里縣在陳州府西北九十里

郡縣志曰宋州柘城縣本陳之株邑故柘城在甯陵縣南七十里陳株邑也攷方輿紀要曰歸德府西南至陳州二百八十里甯陵縣在府西六十里然則柘城在陳國東北百四五十里也寰宇記曰陳州南頓縣西南三十里有夏亭城城北五里有株林攷紀要云商水縣在陳州西南九十里南頓城

卽今縣治古頓城在縣北三十里然則商水乃古頓國地且俱迴遠非是

檜 譜在衛後鄭前左傳國語作郟地理志作會

譜曰檜者古高辛氏火正祝融之虛在禹貢豫州節一滎波之南居溱洧之間祝融氏名黎其後八姓惟妘姓檜者處其地焉周夷王厲王之時檜公不務政事而好絮衣服大夫去之于是檜之變風始作其國北鄰于號釋文曰王云周武王封之于洧洛河潁之間為檜子正義曰杜預云檜城在滎陽密縣東北妘姓之中又有鄢路偃陽故指檜以別之楚世家云吳回生陸終陸終生子六人四曰會人世本會人檜之祖也故韋昭服虔皆云檜是陸終第四子求言後鄭語以為黎後者以吳回係黎之

後復居黎職故本之黎也通典曰河南密縣古郟國有郟水郡

縣志曰郟城在鄭州新鄭縣西北舊作東北誤也三十二里括地志作二十二里

右曾案據左傳國語公羊傳則幽王末寄帑於檜武公因通其夫人叔姪平王之初遂取其國而滅號焉高氏曰郟城在禹州

密縣東北五十里

禹貢外方康成曰潁川密高縣密高山蓋本地地理志今登封

縣北之太室山也於密縣為西北譜曰檜在外方之北劉楨曰郟在外方之北都滎之南左洧右洛居兩水之間食澮洧

焉然徐廣馬彪杜預並言檜在密縣則不得為外方之北也檜風皆西周之詩而匪風云誰將西歸懷之好音似是東周

人語此蘇氏所以有檜詩皆為鄭作之說余友魏默深所著

詩古微本鄭譜次第以爲篇簡錯亂匪風當是王風之末篇以愚攷之乃是刺鄆仲之受鄭帑賄也桓公寄帑賄於檜在幽王八年越二年而有犬戎之難公羊傳言先鄭伯有善於鄆公者通其夫人以取其國夫人卽周語所謂叔妘也先鄭伯則武公也帑孛字通桓公以武公寄檜武公遂黃緣以通其夫人及平王之初遂取其國蓋自寄帑以來不過四五年耳匪風之作殆見帑賄之寄爲檜亡之徵欲以覺悟其主乎夫帑賄之來無端而至非其道也故以發發之飄風興偈偈慄慄之車疾驅而至而鄆仲曾不爲按劍之晒恬而受之至使中冓有言桑中志喜下國之亂如此非由王朝無人周道滅乎憂國之士是以顧之而怛然也未章言亨魚煩則碎治

民煩則散仲旣恃勢而不德民將散矣况又受鄭之寄以促其亡乎如有能還帑賄於西者猶可延旦夕之命我將懷之好音矣此則匪風之義也自毛詩篇誼但云思周道國小政亂憂及禍難而不實指其事夫禍難之端孰如帑賄之寄孰如寄帑滅虢檜之速詩人豈於此不言而漫爲無病之呻吟又豈不憂其國之將亡而但泛焉憂天下之無王哉康成作箋不申憂及禍難之爲何事而爲檜在周東有能西仕於周者我則懷以好音夫西仕於周何救禍亂衛武公鄭武公莊公入仕於周東西周俱有之大車之箋謂子男入爲大夫鄭豈遽忘之哉何詩人於此乃設一不可必之詞擬一無何有之人曰誰將西歸乎

曹

譜曰曹者禹貢兗州陶邱之北地名周武王既定天下封弟叔振鐸于曹今日沛陰定陶是也其封域在雷夏荷澤之野昔堯嘗遊成陽死而葬焉舜漁于雷澤民俗始化其遺風重厚多君子務稼穡薄衣食以致蓄積夾于魯衛之間又寡于患難末時富而無教乃更驕侈十一世當周惠王時政衰昭公好奢而任小人曹之變風始作地理志曰沛陰定陶縣故曹國周武王弟叔振鐸所封禹貢陶邱在西南陶邱亭在南正義曰曹都雖在沛陰其地則踰沛北郡縣志曰古曹國在曹州沛陰縣東北四十七里案本定陶縣唐貞觀初省為定陶鎮輿地廣記曰廣濟軍定陶縣宋太平興國中復置縣元祐中兼置廣濟軍故三腹國陶邱在西南荷澤在東北右曾案今

定陶縣屬曹州府

南山

傳曰曹南山也括地志曰有曹南因名曹郡縣志曰在曹州沛

陰縣東二十里寰宇記在東南詩南山朝濟是也右曾案春秋僖公十

九年諸侯盟于曹南即此十道志曰曹南山汜水出焉水經注以為分

沛入荷漢書高祖即位汜水之陽明一統志曰山在曹州南一百

里州今為府治荷澤縣方輿紀要云在曹縣南八十里未詳

郇

傳曰郇伯郇侯箋云文王之子為州伯左傳曰郇文之昭也服

虔曰郇國在解縣東郇瑕氏之虛也說文曰國在晉地水經注

曰涑水西逕郇城郇伯故國也今解城東北二十四里有故城

在猗氏縣故城西北

杜預云在解西北非也

輿地廣記曰河中府猗氏縣

有郇城

括地志曰在縣西南四里

右曾案方輿紀要曰蒲州臨晉縣有解城

在縣東南十八里春秋時之解梁城漢之解縣也有郇城在縣

東北十五里文王子郇國也

幽

地理志曰右扶風栒邑有幽鄉詩公劉所邑徐廣曰漆縣東北

有幽亭

杜預說同晉省栒邑入漆縣故也

通典曰邠州故幽國郡縣志曰古幽

城在邠州三水縣西三十里栒邑故城在東二十五里括地志

曰三水縣西十里有幽原幽城在原上右曾案國語曰夏之衰

棄稷弗務我先王不窋用失其官而自竄于戎狄之間周本紀

曰不窋奔戎狄之間然則自郃適戎狄者不窋也周本紀曰公

劉雖在戎狄間復修禮樂之業百姓懷之公劉卒子慶節立國

于幽然則公劉非自郃出徙也韋昭注國語以為不窋當太康

之時周本紀曰不窋卒子鞠陶立卒子公劉立公劉為不窋之

孫則非太康之世也方輿紀要曰慶陽府治安化縣即古不窋

城南至邠州二百七十里三水縣在邠州東北七十里又曰州

東北有幽亭州東五十里有幽谷又有古公城今為古公鄉

七月者幽之風也民俗歌謠之詩也公劉立國於幽至于太

王奕世載德勸恤民隱重農務本民懷其化於是作七月之

詩周公采之以訓成王於以見先公忠厚之化致此清俗周

之王業實基於是故毛詩篇詁曰陳王業也不登於二南者

魯先公以別於文王之化也不入於二雅者閭巷之作非朝

廷之事也何以言之地理志曰昔后稷封釐公劉處豳太王徙邠其民有先王遺風好稼穡務本業故豳詩言農桑衣食之本甚備孔叢曰于七月見豳公之所以造周也此卽陳王業之說也而班氏推本於民風是知詩之作於民間也續序言周公遭變故陳后稷先周風化之所由致王業之艱難亦未明言周公所作至康成作譜乃言周公避流言之難出居東都二年思公劉太王居豳之職憂念民事至苦之功以比序已志後成王迎而反之歸政於太平其出入也一德不回純似于公劉太王之所爲太王則大述其志主意于豳公之事故別其詩以爲豳國之變風焉夫周公之陳此詩也在遭變以後與邠未遭變與豳俱有豳不可得知顧謂述序先公之

職以比序已志太師以其主意豳公而別之爲豳風殆不然矣縣述太王不聞爲岐風生民述后稷不聞爲邠風且召康述公劉則登於雅矣周公述文王又登於雅矣七月果爲周公所作何以不登於雅而別之爲豳風以王朝三公之制作下儕於國風則雅降爲風何待平王哉鄭志荅張逸周公事專爲一國上冠先公之業所以在風下次于雅前此自是鄭之臆說豈可以言毛義哉

說文曰邠周太王國在右扶風美陽从邑分聲重文豳美陽亭卽邠也民俗以夜市有豳山从山从豳此許氏之誤也美陽有中水鄉周太王所邑見於地理志所謂岐周也東北去豳百三四十里

烏呼聖人之心其不可見乎周公之誅管蔡商奄於書則金
縢大誥於詩則鴟鴞東山破斧顛末具在而不能不爲說之
者所亂聖人之心可得見哉予嘗攷其歲月比其事之終始
而論之以附於說詩書之末焉昔者武王十三年克殷十五
年有疾周公請以身代十七年十二月武王崩成王元年二
叔流言夏六月葬武王三監及淮夷叛周公東征二年克殷
封微子代殷後周公作鴟鴞秋成王迎周公三年踐奄定淮
夷還歸誥庶邦四年遷殷民封康叔於衛五年營成周六年
制禮樂七年致政何以言之逸周書作雒解云武王克殷既
歸乃歲十二月崩鎬周公立相天子三叔及殷東徐奄熊盈
以畔乃歲者乃後之歲立爲位冢宰總百官也金縢曰武王

既喪管叔及其羣弟流言于國曰公將不利于孺子書傳曰
武王殺紂繼公子祿父及管蔡流言奄君薄姑謂祿父曰武
王已死矣成王幼矣周公見疑矣此百世之時也請舉事于
是祿父及三監叛夫管蔡流言原欲閒疏周公於王王疏周
公則公必遜位羣叔無長於管叔者則王必召管叔而與之
政金縢書之曰管叔及其羣弟言管志也周公知管叔之不
足以定天下故宰相王室管叔之計不行故謀叛益亟史記
魯世家云武王崩成王少周公恐天下聞武王崩而叛乃攝
行政當國管叔流言周公乃告太公召公曰我之所以弗辟
而攝行政者恐天下叛周無以告我太王王季文王三王之
憂勞天下久矣于今而後成我所以爲此將以成周于是卒

相成王管蔡武庚等果率淮夷而反周公乃奉成王命興師
 東伐書序曰武王崩三監及淮夷叛周公相成王將黜殷命
 作大誥是武王崩後三監即叛周公即征其征也以成王命
 而非專兵擅制明矣伏生書傳曰攝政二年救亂謂此也此
 則成王元年之事也逸周書二年作師旅臨衛攻殷此紀克
殷之年
 而連作師旅言之殷大震潰王子祿父北奔管叔經而卒乃囚蔡叔
 于郭陵書傳曰攝政二年克殷書序曰成王既黜殷命殺武
 庚命微子啟代殷後作微子之命唐叔得禾異畝同穎獻詩
 天子王命唐叔歸周公於東史記云歸周
公于兵所作歸禾周公既得
 禾旅天子之命作嘉禾夫天降福祉成王不敢尸其功而以
 歸之周公則君臣之間初無疑忌可知也王有弱弟能奉使

命而雷風之變王與大夫盡弁言弁則是已冠王之年不甚
 幼亦可知也金縢曰周公居東二年則罪人斯得于後公乃
 為詩以貽王名之曰鴟鴞不曰東征而曰居東與詩言我徂
 東山同義緣周公之心而為之諱也毛詩篇誼曰鴟鴞救亂
 也其傳曰甯亡二子不可以毀我王室二子者金縢之所謂
 罪人也公為此詩以遺王首言二子宜誅不可以親親之故
 廢大義此言殷蠹雖殄室家未固漂搖風雨正綢繆拮据之
 時不可以巢幕處堂自謂無患故曰能治其國家誰敢侮之
 逸書度邑曰辰是不失我所未定天保奄與五十國未定建
 侯衛營成周制禮作樂之事未及施行不能比隆于唐虞夏
 商雖有天下猶之未有室家也王與二公皆未及知故作詩

以貽之王於此未敢訓公則猶未知公之志以爲殷蠹已殄
天休已至何嘒嘒爲哉而會有上天動威之異乃遂自新往
迎此則成王三年之事也書序曰成王東伐淮夷遂踐奄作
成王征依馬融本今本作政成王既踐奄將遷其君于蒲姑作將蒲姑
成王歸自奄在宗周誥庶邦作多方蓋二年以前周公以王
命行及王邁雷風之變乃親迎東征故成王征將蒲姑誥多
方皆不著周公孟子曰伐奄三年討其君滅國者五十天下
大說逸書曰凡所征熊盈族十有七國俘維九邑史記曰甯
淮夷東土二年而畢定言二年者不數出征之年也毛詩篇誼曰東山周
公東征也破斧伐柯九畹狼跋美周公也破斧傳曰四國管
蔡商奄書傳曰攝政三年踐奄故詩曰我徂東山惄惄不歸

又曰自我不見于今三年此則成王三年之事也書序曰成
王既伐管叔蔡叔以殷餘民封康叔作康誥酒誥梓材衛世
家云周公以殷餘民封康叔爲衛君居河淇間故商虛逸書
曰俘殷獻民遷于九畢俾康叔宇于殷書傳曰攝政四年封
侯衛此則成王四年之事也五年營成周亦伏生說凡所引皆見正義由是觀之

周公之心一以天下爲心已矣武王曰昔皇祖底于今勛厥
遺得顯義告期付于朕身肆若農服田飢以望穫予有不顯
朕俾皇祖不得高位于上帝乃今我兄弟相後用建庶及惟
武王知周公之能以天下爲心故欲授之位而周公涕泣其
手而不受於是乎植璧秉圭請命三王惟兢兢墜天之寶命
是懼則周公之心固明著於祝冊之中矣昊天不弔武不少

延惟冲子曷克終朕晦公於是焉而辟欲天下之一乎周也
難矣何則天下未集主少國疑公出則二叔入以二叔之才
撫新造之邦將不數月間亂者四起不惟是也周公惟無貪
天下之心故於武王之命涕泣共手而不敢對二叔乃肇流
言之釁必且假武之命周者以自命而冲人不得保其位則
墜天降大命遏佚前人光公將不得辭其責夫是以毅然以
身任天下之重曰我之弗辟我無以告我先王則周公之心
又明著於其語矣書序聖人之所作也周公之書十八篇始
於金縢終於立政無非所以佐成王也而於嫌疑之際尤謹
之大誥曰相成王君奭亦曰相成王自歸禾以至息慎之命
再言天子再言王命曰黜曰伐曰遷曰命曰封曰誥皆繫之

成周詩聖人之所錄也七月陳先世之風以明王業之艱難
鴟鴞明人倫之變而憂天保之未定鴟鴞之志即七月之志
也繼之以東山破斧伐柯九段狼跋以見內弭父兄外接諸
侯上格神主下輯兆民不出三年憂勞勤苦若是其至也皆
所以著明周公之心乎天下也故曰唯聖人能知聖人也洎
乎秦漢去聖遠大道蕪靡說蠡起荀卿大儒也而創爲履天
子籍聽天子之斷以啟莽操之端馬遷良史也而刺取周公
奔楚之文以髣髴金縢之說馬融鄭氏許慎王肅說經名家
也而弗辟則辟位辟罪辟法異訓居東則東征東都殊文淆
亂學者之耳目蓋千餘年於茲矣夫常人之情不可以測賢
者而况於聖避位者避嫌也避嫌之事賢者弗爲辟罪辟法

不告之成王而告之二公是專輒也專輒之事恆情弗順而鄭氏又雜取孫卿馬遷之謬記以罪人爲公屬之與知攝者公爲鴟鴞以請之王吾不知其視王爲何如人視二公爲何如人而周公又奚論哉嗟乎去聖遠大道蕪厖說蠢起非好學深思者惡能心知其意庶幾聖人之心於萬一哉故僅擇周秦之醇說比次其歲月而妄測之曰弗辟之心卽請以身代之心雷電以風之天卽翼日乃瘳之天取于毀室之詠卽死喪孔懷之詠瘖口噤首之志卽勤施勞作之志而總之一致天明命定天保永靈期俾皇祖得高位於上帝之心也願以質世之讀鴟鴞金滕者

或曰子以七月非周公作固已鴟鴞之附於豳何也曰鴟鴞

猶七月也陳七月於未遭變之前陳鴟鴞於已遭變之後使

若錄舊也者而後人遂以爲豳人刺豳君之作

見趙岐孟子注然則

東山以下之附於豳何也曰是固有不得不然者將附於二雅乎雅之中無此體制也將附於二南乎變風不可以爲正也將別一編乎周公不之魯不可以爲魯風壓於天子不可以爲周風鴟鴞既附於豳矣則太師亦竊取周公之意而附之豳焉爾季札聞歌豳樂而不淫其周公之東乎樂而不淫謂七月也周公之東謂鴟鴞東山也

東山

右曾案黎陽東山也一名大伾禹貢導河至于大伾國語商之興也檇杪次于丕山漢書溝洫志賈讓言黎陽南故大金

隄從河西西北行至西山南頭乃折東與東山相屬北盡魏
 界即此東山也今在衛輝府濬縣東二里周五里高四十丈
 有奇舊說謂周公居東為東都非也伏生書傳攝政五年營
 洛邑王肅云七年而克殷在攝政二年時無東都也武王度邑未
 嘗營建至成王定鼎於郊廓而後東都之名定故知非也詩
 言東山史記以東為兵所周書言臨衛攻殷一也墨子曰昔
 周公非關叔東處于商雖傳聞異詞可見居東即東征在商
 地矣其所以必徂東山者是時管蔡首亂敗商而徐奄蒲姑
 淮夷同時煽動徐在臨淮奄在魯蒲姑在齊淮夷在淮浦熊
 盈未詳黃帝之後有熊姓少昊之後有盈姓盈通
 嬴泰山有嬴縣有熊之虛即鄭未知是否大率皆東
 諸侯也商在河北與之往來必道黎陽東山距武庚所居之

朝歌纔七十餘里俯臨大河控扼要津

黎陽津南岸曰白馬津張儀說趙王秦守

白馬之津此由南以制北也韓非說秦王
 決白馬之口以沃魏此由北以制南也

以此離其黨與制

其死命此商之所以大震也

東山距武庚所居之

王氏曰唐杜牧以河北為山東秦漢謂山東山西者皆指太

行山東山即商地案商都在太行山東故衛滑相魏洛邢皆

目太行為西山三國志袁術循西山而南是也自澤潞晉絳

言之乃為東山周公伐殷不應舍河南坦途取道于晉之山

險使武庚置一軍塞壺口則周敗矣故知不然也且管蔡本

封俱在河南周公徂征自必先舉管蔡而後及殷衛世家云

管蔡與武庚作亂欲攻成周此雖探其意而為之詞亦可見

時之所急在河南必不道晉絳澤潞而東也

四國 正義曰書序云成王既黜殷命成王既伐淮

傳曰管蔡商奄也正義曰書序云成王既黜殷命成王既伐淮

夷遂踐奄皆東征時事不敷淮夷者以淮夷是東方之夷四國

謂諸夏之國也書序言成王者君統臣功此則專美周公也說

文曰奄國在魯書多方序注曰奄國在淮夷之旁左傳注曰奄

嬴姓括地志曰兗州曲阜縣奄里即奄國之地也右曾案郡國

志曰魯國魯縣古奄國

白虎通引傳曰周公入為三公出為二伯中分天下出黜陟

詩曰周公東征四國是皇言東征述職周公黜陟而天下皆

正也此所引傳未知何書但破斧缺斨明是征殷之士托以

起興周公黜陟修二伯之職何有斧斨之破缺傳蓋斷章取

義未可據以說詩也

皇清經解續編卷千四十一終

仁和葉維幹校
上海范本禮校

皇清經解續編卷千四十二

南菁書院

詩地理徵四

嘉定朱右曾亮甫著

小雅

周道倭遲

釋文韓詩作倭夷

傳曰周道岐周之道也倭遲歷遠之貌右曾案文選注引韓詩作威夷辭君威夷險也

地理志曰右扶風郁夷縣詩周道郁夷顏師古曰四牡詩周道倭遲韓詩作郁夷言使臣乘馬行於此道右曾案班氏說詩皆本齊魯此亦當然師古誤以為韓詩也爾雅西陵威夷威倭聲同威郁聲轉遲省作迟夷古作尸故展轉字異漢郁夷故城在今鳳翔府隴州西五十里隴阪在焉故玉篇曰隃

夷險阻也

管

郡國志曰河南中牟縣有管城管叔邑括地志曰鄭州管城縣今州外城即管國城叔鮮所封右管案今開封府鄭州也

蔡

地理志曰汝南郡上蔡縣故蔡國周武王弟叔度所封括地志曰豫州上蔡縣在州北七十里古蔡國外城叔度所都有蔡岡在縣東十里因名右管案今汝甯府上蔡縣也

王氏引郡國志河內山陽縣有蔡城劉昭曰蔡叔邑攷水經沁水注引郡國志山陽有郟城京相璠曰山陽縣西北六十里有郟城璠蓋以為春秋之葵邱也今本郡國志無郟城之

自然則蔡城即葵城之訛矣昭注非是

獫狁釋文獫本或作獫狁本或作允韓怡曰說文無獫狁字漢書匈奴傳引詩獫狁之故衛青傳亦作獫允

傳曰獫狁北狄也箋曰北狄今匈奴也史記匈奴傳曰唐虞以上有山戎獫狁葷粥居於北蠻晉灼曰堯時曰葷粥周曰獫狁秦曰匈奴右管案匈奴之先史記以為夏后氏之苗裔魏書以為黃帝之曹夏后氏亦出於黃帝也孟子曰太王居邠狄人侵之又曰大王事獯鬻則殷周之際自今邠州以北悉為荒服矣史記曰武王放逐戎夷涇洛之北則今慶陽榆林延安之境也春秋白狄疑即其遺種至六國時趙武靈王北破林胡樓煩築長城自代並陰山下至高關為塞秦漢因之則今山西歸化城以西及鄂爾多斯之地也

漢書匈奴傳曰懿王時戎狄交侵暴虐中國詩人疾而歌之
曰靡室靡家玁狁之故此與史記以六月之薄伐玁狁至於
太原出車之出輿彭彭城彼朔方爲周襄王時詩漢書以出車爲宣王
之同爲斷章成文不可依據鄭氏譜曰小雅自鹿鳴至於魚
麗先其文所以治內後其武所以治外南有嘉魚下及菁菁
者我周公成王之時詩也鄭意以魚麗以上爲文王時以下
爲武王時詩正義引服虔左傳注曰自鹿鳴至菁菁者我道
文武備小政定大亂致太平樂且有儀是爲正小雅說雖小
異大致俱同又出車傳曰王殷王也南仲文王之屬則不得
爲武王以後詩

方朔方

傳曰方朔方近獫狁之國也朔方北方也箋曰築城於朔方爲
壘以御北狄之難六月箋曰鎬也方也皆北方地名郡縣志曰
夏州朔方縣什賁故城在縣治北卽漢朔方縣之故城也詩所
謂城彼朔方是也漢武帝元朔二年收河南地置朔方五原郡
使蘇建築朔方城什賁之號蓋蕃語也右曾案朔方漢縣屬朔
方郡唐爲夏州治元廢今榆林府西北二百里廢夏州城是也
乾隆府廳州縣志曰漢朔方城在鄂爾多斯右翼後旗界內
案堯典朔方與嵎夷南西爲四表蓋唐虞之盛過於漢之輿
地迨三代之衰戎狄入居中夏文王攘之宣王又攘之紀於
詩歌伊洛之間交乎戎迹其外無論矣史記趙武靈王攘北
地至燕代西至雲中九原其後趙益衰匈奴強遂入居河南

秦始皇三十三年使蒙恬斥逐匈奴收河南地為四十四縣築長城因地形用制險塞楚漢之際匈奴復熾南渡河大為邊患元朔二年遣衛青等渡西河歷高闕復收河南地立朔方郡高闕即鎬也說詳後其地三面據大河之險為北顧之屏藩饒水草宜畜牧又有鹽池之利主父偃言於武帝曰河南地肥饒外阻河蒙恬城之以逐匈奴內省轉輸戍漕廣中國邊備之本後漢順帝時羌亂西河上郡朔方皆殘破虞詡上疏曰三郡沃野千里水草豐美土宜產牧宜復營城邑事耕屯唐郭子儀亦云朔方國之北門西禦羌戎北虞獫狁由是觀之中國之變計獫狁之窺伺恆在朔方夷夏之強弱關中之安危恆視朔方之得失南仲城朔方而獫狁於襄蒙恬衛

青取河南而匈奴衰弱唐築三受降城而西鄙安息明失河

套而陝西之患亟其明徵也

西戎昆夷混夷犬戎串夷釋文串古患反

犬夷混夷犬戎串夷釋文串古患反

箋曰昆夷西戎也采薇序混夷戎狄國也縣串夷即昆夷西戎國

名也皇正義曰帝王世紀云文王受命四年周正月丙子朔昆

夷氏侵周一日三至周之東門文王閉門修德而不與戰昆夷

進來不與戰明退即伐之也尚書傳四年伐犬夷注云犬夷昆

夷也南仲一行并平二寇采薇患夷者患中國之夷則混夷也書

傳作吠夷吠混聲相近或作犬夷犬即吠之省也皇王氏曰山

海經云黃帝生苗龍苗龍生融吾融吾生弄明弄明生白犬白

犬有牝牡是為犬戎漢書匈奴傳曰隴以西有犬戎有晉案宋庠國語補音引唐人說犬戎今鄯州羌蓋自鄯以東至隴皆古昆夷所處矣

案西戎之患與周相終始史記匈奴傳曰公劉邑於豳三百有餘歲戎狄攻大王亶父亶父亡走岐下其後百有餘歲周

西伯昌伐畎夷後十有餘年武王伐紂其後二百有餘年周道衰穆王伐犬戎穆王之後二百有餘年申侯與犬戎共殺

周幽王於驪山之下秦襄公救周伐戎至岐始列為諸侯又曰自隴以西有縣諸

正義曰括地志縣諸城秦州秦嶺縣北五十六里漢縣諸道屬天水郡戎顏師古曰混夷也韋昭云春秋以為犬戎翟豸之戎正義曰括地志獮道故城在渭州襄武縣東南岐梁山涇漆之北有義渠正義曰括地志甯州慶州三十七里古獮戎邑

本義渠戎國大荔徐廣曰後更名烏氏徐廣曰在安定括地志在涇州安定縣東

秦北地郡也三十胸衍之戎徐廣曰在北地括地志後漢書西羌傳曰太康失國四夷背叛及相即位乃征畎夷七年然後來賓至于泄

始加爵命由是服從桀之亂畎夷入居邠岐之間成湯既興伐而攘之武丁征西戎三年乃克及武乙暴虐犬戎寇邊周

古公踰梁山而避于岐下案侵邠者狄人獯粥非犬夷也此誤及子季歷遂伐西落鬼戎太丁之時季歷復伐燕京之戎後二年周人克余

無之戎于是太丁命季歷為牧師自是之後更伐始呼翳徒之戎皆克之及文王為西伯西有昆夷之患北有獫狁之難

遂攘戎狄而戍之莫不賓服乃率西戎征殷之叛國以事紂案此文多據古文紀年為說由是言之小雅出車大雅緜皇矣所詠蓋一

時之事周語曰穆王將征犬戎祭公謀父諫曰荒服者王蓋
犬戎本在西垂殷之衰入居雍土文王逐之遂居西垂

唐書吐谷
渾傳有樹敦城方輿紀要城在西甯衛
西曼頭山北祭公所謂犬戎樹敦者也然穆天子傳曰天子

至雷首犬戎胡觴天子于雷首之阿則是時仍是處中國者

厲王之伐入于犬邱

此西犬邱今秦州西南
百二十里西縣故城也宣王之世犬戎

滅秦成之族王命秦仲誅之不克見殺則時已入居秦隴之

鄙逼近西畿至幽王十一年遂覆宗周襄公攘之乃有小戎

之詠而春秋閔公二年號公敗犬戎于涇汭則秦所攘而未

盡者與西羌傳曰平王之末涇首有狄獠邾冀之戎涇北有

義渠之戎洛川有大荔之戎渭南有驪戎皆昆夷之支流餘
裔矣

南有嘉魚

傳曰江漢之間魚所產也左大冲蜀都賦曰嘉魚出于丙穴注

曰丙地名有魚穴之所常以三月取之陸氏曰丙穴在漢中沔

陽縣北穴口向丙故名類要曰丙水出丙穴在興州順政縣興

地記曰大景山在興州南七十里與小景山相連有丙穴產嘉

魚右曾案水涇沔水注曰褒水東南得丙水口水上承丙穴穴

出嘉魚常以三月出十月入穴口廣五六尺去平地七八尺有

泉懸注魚自穴下透入水下注褒水今漢中府畧陽縣南三十

里有大丙小丙山也亦名大景小景山唐諱丙改曰景

焦獲

傳曰焦獲周地接於獫狁者正義曰釋地云周有焦獲郭璞曰

今扶風池陽縣瓠中是也其澤藪在瓠中而藪外猶焦穫所以
接于獵狝也孫炎曰周岐周也以焦穫繼岐周言之則于鎬京
為西北也王氏曰漢書溝洫志曰韓水王鄭國說秦令鑿涇水
自中山西邸瓠口為渠班彪北征賦曰夕宿瓠谷之元宮注曰
瓠谷在長安西寰宇記曰焦穫藪在京兆府涇陽縣北外十數
里亦名瓠口右曾案淮南墜形訓九藪秦之陽紆高誘曰在馮
翊池陽一名具圃紆亦作陟讀如胡穫瓠音同陟則聲之轉也
史記犬戎弑幽王遂取周之焦穫蓋藪饒水草故屢為戎夷所
據明一統志曰焦穫澤在西安府涇陽縣西北方輿紀要云在
中山西中山在
縣西北池陽廢縣在二原縣西北二十里漢時遺址畧存長安
志池
陽舊城南去涇戴震毛鄭詩攷正云既整其衆處于焦穫乃侵
陽縣二十八里

鎬及方至于涇陽則焦穫在外鎬方涇陽在內下章言薄伐獫
狁至于太原卒章言來歸自鎬則焦穫鎬方在太原涇陽之間
王師逐之至太原後仍軍於鎬平定然後歸也涇陽今平涼府
平涼縣西南太原即安定郡高平今平涼府固原州

鎬

箋曰北方地名正義曰鎬方雖在焦穫之下不必先焦穫乃侵
鎬方王基曰據下章云來歸自鎬我行永久言吉甫自鎬來歸
猶春秋公至自晉公至自楚也故劉向曰千里之鎬猶以為遠
鎬去京師千里長安洛陽代為帝都而沛陰有長安鄉漢中有
洛縣皆與京師同名者也右曾案侵鎬及方溯其始也至于涇
陽言其終也詩人言昔文王繕朔方為塞獫狁于襄今乃整齊

處周之焦穫以建牙帳蓋其始侵鎬及方窺伺塞下非一日矣
浸尋不禁乃至侵及涇陽深入內地所以不得已而非時出師
也史記趙武靈王築長城自代並陰山下至高關為塞漢書元
朔二年衛青渡西河至高關破匈奴五年大將軍青伐匈奴出
朔方高關水經注河水自嵐渾縣東屈而東流逕高關南關口
有城跨山結局謂之高關戍劉昭曰高關北距大磧口三百里
史記正義稱地理志云朔方臨戎縣北有連山險于長城其中
斷兩峯具峻名為高關鎬通作鄯高關其卽鎬與光武改鄯為高邑秦本紀
高池君高方輿紀要曰臨戎城在廢夏州西北夏州周一千三
四百里也劉向欲言其近故約舉千里耳

涇陽

箋曰來侵至涇水之北言大恣也通典曰今涇原州地並涇水
之陽郡縣志曰原州平涼縣本漢涇陽縣地今縣西四十里涇
陽故城是也涇水源出百泉縣西南涇谷右曾案六國時秦有
涇陽君蓋封此地平涼縣今為平涼府治涇州在府東百五十
里自平涼府治東南至西安府六百五十里

太原

正義曰王肅云宣王親伐獫狁出鎬京而還使吉甫追伐追逐
乃至太原則毛意上四章說王親行下二章說遣吉甫行也
王氏曰後漢西羌傳云穆王遷戎于太原夷王命虢公率六師
伐太原之戎至于俞泉宣王遣兵伐太原戎不克周語宣王料
民于太原右曾案地理志曰五邊郡本秦九邊郡武帝元朔二

年更名太康地理志曰自北地郡北行九百里得五邊塞通典

曰漢五邊縣城在榆林縣西榆林唐勝州治大思其不文風

日知錄曰詩太原今之平涼禹貢雖指曰漢安定郡治高平

縣後廢元魏改置曰平高唐為原州治廣德元年沒吐蕃節

度使馬璘表置行原州于靈縣之百里城貞元十九年徙治

平涼縣西去故州一百六十里今固原州也廢縣在州西南

四十平涼乃古涇陽在固原之東獫狁侵及涇陽而薄伐之

自涼逐之出塞不窮迫也攷固原于漢但名高平無邊之號

至元魏始置原州且經以鎬方並言明鎬與方相近上言至

于太原下言來歸自鎬明太原又與鎬相近獫狁自焦穫而

至涇陽兵鋒焱忽蹂躪五六百里自吉甫逐之自涇陽至高

平纔百數十里安得有武功之盛即以為鎬在高平與子政

所云千里之鎬亦不合也

蠻荆 段玉裁云漢書韋賢傳引荆蠻來威案毛云云然則毛詩固作荆蠻傳寫倒之也

傳曰荆州之蠻也鄭語史伯曰當成周者南有荆蠻韋昭曰芊

姓之蠻鬻熊之後也史伯又曰叔熊逃難于濮而蠻晉語叔向

曰昔成王盟諸侯于岐陽楚為荆蠻置茅蒨設望表與鮮牟守

燎吳語曰有蠻荆之虞後漢書南蠻傳曰盤瓠後滋蔓今長沙

武陵蠻是也周世黨衆彌盛宣王中興乃命方叔南伐蠻方右

曾案荆州之蠻非一種史伯叔向所謂荆蠻即楚也長沙武陵

蠻即五溪蠻也干寶晉紀曰槃瓠之後雜居五溪水經沅水注

曰雄溪楠溪無溪酉溪辰溪左右悉是蠻所居是也又有廩君

種後漢書曰巴郡南郡蠻本有五姓皆出武落鍾離山山在今宜昌府
長陽縣西北然則江漢之間悉有蠻種依范蔚宗說此經荆蠻
七十八里卽五溪蠻矣

甫草

箋曰甫田之草也鄭有甫田正義鄭有圃田釋地文也郭璞曰
今滎陽中牟縣西圃田澤是也職方曰河南曰豫州其澤藪曰
圃田宣王之時未有鄭國圃田在東都畿內王氏曰穆天子傳
曰天子里甫田之路東至于房竹書紀年曰梁惠成王十年入
河水于甫田又爲大溝而引甫水郡國志曰河南中牟縣有圃
田澤水經注曰澤多麻黃草述征記云踐縣竟睹斯卉窮則知
踰竟詩所謂東有甫草也郡縣志曰圃田澤一名原圃在鄭州

中牟縣西北七里其澤東西五十里南北二十六里西限長城

東極官渡上承管城界曹家陂在管城縣東三里又溢而北流爲二十

四陂補傳曰甫田易野也易野以車爲主故用以選車右曾案

傳訓甫爲大言于廣大之處芟草爲防也後漢書班固傳注引

韓詩曰東有圃草馬融傳注又引然則箋易傳訓實本韓義甫作圃草誤也

田本周藪爾雅作于周末故係之以鄭列子居鄭圃四十年無

人識者亦曰圃中戰國策信陵君曰秦七攻魏五入圃中史記

索隱曰卽圃田也

敖

傳曰地名箋曰鄭地今近滎陽郡國志曰河南滎陽有敖亭水

經注曰沛水東逕敖山北山上有城殷仲丁所遷秦置倉于其

中括地志曰滎陽故城在鄭州滎澤縣西南十七里殷時敖地在敖山之陽郡縣志曰敖山在鄭州滎澤縣西十五里春秋時晉師在敖鄙之間呂氏曰晉師救鄭設七覆於敖前則敖山下平曠可以屯兵翳蒼可以設伏補傳曰敖險野也險野以人為主故用以選徒右曾案穆天子傳宿于囂氏之隧亦即此敖山在今開封府滎澤縣西北廢河陰縣西二十里

漆沮 率西水澗

傳曰漆沮之水麇鹿所生也從漆沮驅禽而至天子之所曰吉漆沮岐周之二水也潛箋曰公劉失職遷于幽居沮漆之地縣首循西水厓沮漆水側也縣二正義曰幽有漆沮之水但二水東流亦過周地故下傳曰周原漆沮之間縣薦獻所取不宜遠于

京邑故不言幽言岐周者鎬京去岐不遠潛嚴氏曰此詩縣沮

漆指幽國是漆沮之上流也下文周原傳以為漆沮之間是漆

沮之下流也吉日及潛頌言漆沮指鎬京當亦去岐周不遠也

段氏漆沮有二皆出雍州皆東入于渭特有上流下流之別詩

漆沮入于渭之上流書漆沮入于渭之下流十三州志云漆水

出漆縣西北至岐山東入渭漢書注曰漆水在新平後漢書注

漆縣故城在邠州新平縣沮水不知所在此詩之沮漆也右曾

案山海經曰踰次之山漆水出焉北流入于渭道元曰蓋自北

而南矣地理志曰右扶風漆縣漆水在西說文曰漆水出右扶

風杜陽縣岐山東入渭水經曰漆水出扶風杜陽縣俞山東北

入于渭水經渭水注曰杜水出杜陽山其水南流謂之杜陽川

東南流左會漆水水出杜陽縣之漆谿謂之漆渠故徐廣曰漆水出杜陽縣之岐山也漆渠水南流大巒水注之即岐水也二川并逝俱為一水南與杜水合逕岐山西屈逕周城南又歷周原下括地志曰漆水出岐州普潤縣東南岐漆山攷方輿紀要云邠州西南至鳳翔府百六十里新平廢縣在州治西漢漆縣也麟遊縣在鳳翔府東北百二十里本漢杜陽縣地乾隆志杜陽故城在麟遊縣西北漆水在西東南流至岐山界合橫水入渭岐水在西東南合漆杜水在南東南入武功界澄水在縣城東南南流合杜普潤城在麟遊縣西百二十里本漢漆縣地漆谿在縣南流出廢普潤縣東下流為漆水漆縣故城無攷當在麟遊東北紀要謂在邠州西扶風縣在鳳翔府東百二十里漆河在城東一里自廢普潤縣流入縣界雍水自鳳翔縣竟東流合焉又東流逕此有漆水橋跨其

上下流入武功縣界南合漳水以入渭是漆水出豳之西南竟

南流屈東而至岐周或言出杜陽或言出漆縣其實一也康海武功

縣志曰浴水在縣北出乾州梁山南流入竟合漆水關西人讀浴若於與沮相近蓋沮水之譌

吉日集傳漆沮在西都畿內涇渭之北所謂洛水今流入鄜

坊至同州入河王氏曰孔氏曰在涇水之東一名洛水與自

土沮漆者別水經注曰洛水關駟以為漆沮之水寰宇記曰

漆水自耀州同官縣東北界來經華原縣合沮水沮水出坊

州昇平縣北子午嶺俗號子午水合榆谷慈馬等川遂為沮

水至耀州華原縣合漆水至同州朝邑縣東南入渭右曾案

詩之漆沮在漢為右扶風竟在涇水西書之漆沮于漢為北

地及左馮翊竟在涇水東周時但謂之洛水職方雍州其浸

渭洛周語三川震葦昭解謂涇渭洛是也左傳曰成有岐陽之蒐蒐狩之處惟岐陽為宜吉日詩瞻彼中原即所謂周原廡廡也今世所傳石鼓文說者以為宣王之鼓其文正與吉日相類而鼓出於鳳翔故知此漆沮亦扶風之水與洛水無涉也

史記周本紀太王去邠度漆沮踰梁山至岐下豳鄉故城在今邠州三水縣西三十里于邠州即漢漆縣為北少東自邠至岐則西南行也梁山在今乾州西北五里州北至邠州百五十里西至扶風縣百許里山勢紆迴接扶風岐山二縣之竟縣詩自西徂東周爰執事箋曰豳與周原不能為西東據至時從水辭言也蓋自豳西南行渡涇而南踰梁山仍循漆沮水東至周原故鄭志答

張逸曰豳地今為栒邑縣故城在今三水縣東北二十五里在廣山北即梁山也

以其縣互廣沮水西此即出北地直路西東入洛者也有涇水從此西南行

正東乃得周故言東西云岐山在長安西北四百里今自西安府至

鳳翔府三百四十里豳又在岐山西北四百里句誤也當作岐山箋志東北百四十里

俱極明晰穎達作疏既云漆沮在豳東過周地又云禹貢雍

州云漆沮既從孔安國言漆沮一名洛水漆沮為一蓋沮一

名洛孔連言之穎達意以漆為漆縣漆水沮為直路沮水不

知漆自入渭沮自入洛入洛之沮不過周地非特與潛頌毛

傳悖亦與其言相矛盾矣趙氏校水經注引周本紀語脫沮

字近高郵王氏說詩改自土沮漆為自土杜徂漆亦以岐陽

無沮水故耳夫川土變易名稱紛亂古地之莫攷於今夥矣

奚獨沮疏又以梁山為夏陽之梁山尤繆不足辨

嚴氏曰水經云沮水出北地直路縣東過焉翊設初縣北東

入于洛此沮水之源流也漢志扶風漆縣漆水在縣西東入

渭鬪駟十三州志曰漆水出漆縣西北至岐山東入渭此漆

水之源流也至孔氏引水經云沮水俗謂漆水又謂之漆沮

此則名稱相亂矣諸家書解謂扶風漆水入渭在灋之上流

而書言渭水會灋會涇之後乃過漆沮則漆沮在灋水涇水

之下流與詩別也但水經出北地者止是沮水而謂之漆沮

耳如上所言則詩之漆沮自是二水書之漆沮止是一水即

詩之沮也右曾案嚴氏以書之漆沮為即詩之沮水沿孔氏

之謬也凡水之例兩水相入互攝通稱說文水經謂沮入洛

而書以洛為漆沮則亦洛入沮矣

水經注沮水出直路縣直路故城在邠州中部縣西北二百里沮水出縣西二百里子午嶺東

南流歷檀臺川屈而西流又西南逕宜君川謂之宜君水又

東南逕設初縣故城西在今西安府耀州東北一里南合銅官水又南出

土門山西在耀州東南四里謂之沮水又東逕懷德城南在西安府富平縣西

南十五里東注鄭渠分為二水一水東南出即濁水也至白渠與

澤泉合俗謂之柴水又謂之柴沮水絕白渠東逕萬年縣故

城北在西安府臨潼縣北五十里鬪駟曰縣西有涇渭北有小河謂此水

也其水又南屈名石川水又南入于渭其一水東出與澤泉

合水出沮東澤中在今富平縣西十三里與沮水隔原相去十五里俗謂之

柴水也東南合沮水又自沮直絕注濁水至白渠合焉故濁

水得柴沮之名沮循鄭渠東逕蓮勺縣故城北在西安府渭南縣北七十里

又東逕粟邑縣故城北在同州府白水縣西北二十八里又東北注于洛

善長所敘漆沮止于此耳至宋敏求長安志則云沮水自邠

州東北來至華原縣南流今耀州也乃合漆水入富平縣界石川

河乃為合漆之地程大昌雍錄本之夫自鄜州中部縣沮水

所原之處西去邠州二百餘里不得為古公所渡也自華原

東北銅官縣界來者善長但謂之銅官川而宋氏以為漆水

何所案據乎郡縣志曰漆水在新平縣西九里北流注于涇

寰宇記曰水經注云漆水自宜祿縣界來又東過漆縣北今本

水經注無此文郡縣志云官祿縣東至邠州八十里今長武縣是即今邠州所治也今縣西

九里有白土川東北流逕白土原東陳陽原西又東北注涇

水恐是漢之漆水但古今異名耳夫漢志漆水不言所入然

說文水經闕駟酈元並言入渭其入涇之漆則於古無聞未

可據以為是也潘岳關中記曰關中有涇渭灃澇鄠鄠漆沮

之水鄠鄠漆沮四水在長安西南鄠縣皆注鄠鄠水北注渭

此則於扶風北地兩漆水外又一漆沮矣

千畝祈父

傳曰宣王之末司馬職廢姜戎為敗箋曰與姜戎戰于千畝而

敗之時也正義曰周語云宣王三十九年戰于千畝王師敗績

于姜氏之戎右曾案韋昭曰姜氏之戎西戎之別種四獄之後

也周語又云宣王既喪南國之師乃料民于太原韋昭曰敗于

姜戎氏時所亡也南國江漢之間然則作祈父詩者其南國之

皇清經義卷之四
田據此知池竭為田而因以其流
者曰為鎬水非復禹周舊迹也

褒

傳曰褒國也姒姓也有褒國之女幽王惑焉而以為后詩人知其必滅周也晉語史蘇曰周幽王伐有褒有褒人以褒姒女焉鄭語史伯曰褒人褒姒有獄而以入于王韋昭注褒姒褒君也國都城記曰褒姒姓夏同姓所封輿地廣記曰興元府褒城縣故褒國漢置褒中縣括地志曰褒國故城在縣東二百步右晉案方輿紀要曰古褒國城在漢中府褒城縣東三里駱駝坪中有褒姒臺

十月之交豔妻煽方處豔魯詩作閻毛傳曰豔妻褒姒也美色曰豔而箋易傳訓以十月之交為刺厲王詩以豔妻為厲

王姬正義稱中候曰剡者配姬以放賢剡豔古今字耳中候適雅戒曰昌受符厲倡孽期寸之世權在相自文數之至厲王除文王為十世此鄭所據也箋又曰幽王時司徒乃鄭桓公友非此篇之番是以知然右曾案箋非也閻剡與豔聲近字易漢書左雄疏曰幽厲昏亂褒閻用權谷永疏曰昔褒姒用國宗周以喪閻妻驕扇日用不滅班婕妤賦曰哀褒閻之為郵然班固古今人表無閻妻且以閻妻為厲王姬則閻當為國然唐世系表閻國系出於姬非剡也况申伯為宣王元舅明是厲后申女姜姓也左傳宋督見孔父之妻于路且逆而送之曰美而豔豔妻云者因褒姒之色以為號耳周本紀幽王嬖褒姒在幽王三年鄭語桓公為司徒在幽王八年則

八年以前為司徒者安知非番孔氏強申鄭旨謂桓公初為司徒褒姒仍未為后不知史伯所云皆追述前事改竄國語以就箋訓可乎經云百川沸騰山冢舉崩高岸為谷深谷為陵正詠地震之事周語曰幽王三年西周三川皆震詩刺幽王可知也唐一行推歷周幽王六年計月辛卯朔日有食之則詩刺幽王又可知也鄭以十月之交而無正等四篇並為厲王詩毛公移其篇第然正義言韓詩篇次同毛則非毛公所移易又可知也

且以賦於古曾案於非也國與禮義

向和文王為十世也漢初賦出於此又曰曾王知而於此禮賦

正義曰左傳說桓王與鄭十二邑向在其中杜預曰河南軹縣西有地名向上則向在東都之畿內也有曾案水經注曰天漿

瀾水出軹南舉向城北城在鞏上關駟十三州志曰軹縣南山西曲有故向城竹書紀年鄭侯使韓辰歸晉陽及向更名向日高平括地志曰高平故城在河陽縣西四十里河陽今懷慶府孟縣也軹縣故城在今懷慶府沁原縣南十三里公也蓋去無九域志曰同州有向城詩作都于向謂此未詳其本也

蘇公於又蘇蘇國古又曰古詩賦尚矣國語王謂

箋曰畿內國正義曰蘇忿生之後成十七年左傳曰昔周克南使諸侯撫封蘇忿生以溫為司寇則蘇國在溫杜預曰今河內溫縣是蘇在東都畿內也春秋時蘇稱子此云公者蓋子爵而為三公也王氏曰鄭語蘇已姓昆吾之後地理志曰河南溫縣故國已姓蘇忿生所封實字記曰故溫城在孟州溫縣西三十

里右曾案忿生為司寇而周公立政稱為蘇公則蘇本公爵後
 降為子耳鄭樵通志曰蘇鄴西蘇城是蓋夏殷之世本封在鄴
 晉語紂伐有蘇是也忿生為周司寇乃居于温鄴在今彰德府
 臨漳縣西温今懷慶府温縣同武順蘇國亦蘇也蘇曰今國內
 姜伯氏吹壘仲氏吹篪箋以為喻正義稱世本曰暴辛公作墳
 蘇成公作篪又稱譙周古史攷曰古有墳篪尚矣周幽王時
 暴辛公善墳蘇成公善篪記者因以為作謬矣世本之謬信
 如周言然可知作此詩者為成公所刺者為辛公也諡法無
 辛蓋以幹支立號如齊有丁公癸公巳公陳有申公之類
 暴辛蓋以幹支立號如齊有丁公癸公巳公陳有申公之類
 箋曰畿內國名正義曰春秋之世為公者多是畿內諸侯書未

聞畿外有暴國今暴公為卿士明是畿內當卿士兼公官也王
 氏曰春秋文八年公子遂會雜戎盟于暴杜氏曰鄭地右曾案
 一名暴隧左傳成十七年楚侵鄭及暴隧

芄野

傳曰芄野遠荒之地蘇氏曰地名右曾案說文曰芄遠荒也爾
 雅觚竹北戶西王母曰下謂之四荒郭璞曰西王母在西穆天
 子傳曰天子賓于西王母乃紀其迹于弇山名曰西王母之山
 地理志曰金城郡臨羌縣西北至塞外有西王母石室崑崙山
 祠後漢書明帝紀竇固出敦煌崑崙塞擊破白山虜于蒲類海
 上章懷太子曰崑崙山名周穆王見西王母于此山有石室王
 母臺臨羌廢縣在今西甯府西崑崙山在今肅州西南此即爾

雅四荒之地也毛許並以遠荒釋芄野當與此相近又案淮南
修務訓曰野穢有芄菴槎櫛窟虛比連以象宮室西戎之俗板
屋穴居芄野之名殆取于此乎

淮水

地理志曰南陽平氏縣桐柏大復山在東南淮水所出東南至
淮陵入海過郡四行三千二百四十里青州川右曾案山海經
言淮出餘山在朝陽東義鄉西水經言出胎簪山東北過桐柏
山攷平氏故城在今南陽府桐柏縣西北四十里淮水出縣西
三十里淮井有泉三處湧出卽于池邊伏流地下三十許里東
出桐柏之大復山而東流經今汝甯府之信陽州羅山正陽光
州之息縣光山光州固始安徽潁州府之阜陽霍邱潁上鳳陽

府之壽州懷遠鳳陽臨淮泗州之五河泗州盱眙江蘇淮安府
之清河山陽安東入海漢志淮陵蓋淮浦之誤淮浦卽今安東
縣也

三洲

傳曰淮上地蘇氏曰始言湯湯水盛也中言潛潛水流也終言
三洲水落而洲見也言王之久于淮上而忘反也右曾案水經
注曰淮水又東爲安風津津中有洲俗號關洲蓋津關所在故
洲納厥稱通校全淮惟此有洲在今霍邱縣北也

傳曰幽王用樂不與德比會諸侯于淮上鼓其淫樂以示諸侯
賢者爲之憂傷箋不用傳亦不言會諸侯苟不會諸侯王曷爲
作樂于淮上左傳曰周幽爲太室之盟戎狄叛之潁水源于太

室而入于淮意王既會遂浮潁入淮數穆天子之浮于滎水以
奏廣樂宣其汰侈于諸侯而不知戎狄之竊發此賢者所以聞
樂而拊心也正義曰鄭于中候握河注曰昭王之時鼓鐘之詩
所爲作者蓋依三家說右曾案昭王南征無緣流
連于淮上若作穆王則與左傳
穆王有塗山之會適合未詳

洛

傳曰洛宗周漑浸水也正義曰宗周鎬京也夏官職方氏正西
曰雒州其浸渭洛是洛爲宗周之浸水也禹貢曰漆沮既從孔
安國云漆沮一名洛水與東都伊洛別矣王氏曰淮南墜形訓
洛出獵山注曰獵山在北地西北夷中東南流入渭詩云瞻彼
洛矣是也說文曰洛水出左馮翊歸德北夷中徐鍇曰歸德當
歸德不誤左馮翊
當作北地郡耳東南入渭雒州浸括地志曰洛水一名漆沮

水原出慶州洛原縣白於山東南逕鄜丹同三州至華陰北南
流入渭右曾案周語幽王時三川震韋昭曰涇渭洛也史記周
本紀云文王獻洛西之地于紂晉世家云文公攘戎翟居于河
西圖洛之間漢地理志云北地歸德縣洛水出北蠻夷中入河
左馮翊懷德縣洛水東南入渭雒州浸山海經曰白於之山洛
水出于其陽而東流注于渭郡縣志曰白於山一名女郎山在
洛源縣北三十里方輿紀要曰歸德廢縣在慶陽府安化縣東
北百里洛水出合水縣北二十里白於山東經延安府保安縣
西南南經安塞甘泉西鄜州東洛州西南中部東宜君東又東
過西安府耀州西三原東北富平西北白水東又東南經澄城
西南同州西至朝邑縣南而入渭傳箋以洛爲喻興明王恩澤

及于天下呂氏王氏及集傳並以為東都之水則賦也攷東都之水字本作雒職方氏雒州浸渭洛豫州川滎雒班志說文俱依以為說是雒與洛別也自魏文帝改雒陽之雒為洛而後雒洛二字相亂文帝詔見三國志裴松之注今經典皆魏晉後師儒所亂故宋人有此說其實非也段玉裁曰魚豢云漢火德忌水故洛字去水以前皆用雒非漢去水加佳也

蠻髦傳曰蠻南蠻也髦夷髦也箋曰髦西夷別名武王伐紂其等有八國從焉牧誓庸蜀羌髳孔氏曰髳在巴蜀括地志曰姚府以南古髳國之地有髳州右曾案爾雅疏云蠻者風俗通云君臣同川而浴極為簡慢蠻者慢也其類有八李巡云一曰天竺二

曰咳首三曰儵僥四曰跂踵五曰穿胸六曰儻耳七曰狗軹八曰旁脊新唐書地理志曰髳州漢越雋地廢髳州在楚雄府大姚縣境後漢書西羌傳武王伐商羌髳率師會牧野則髳亦西戎也武德四年置西濮州貞觀十一年更名南接姚州李元陽曰髳人今北勝今永北廳也

傳曰謝邑也黍苗周之南國也崧高正義曰申伯本國近謝今命為州故改邑于謝雖舊是伯爵今改封之後或進爵為侯周本紀曰申侯與西戎共攻幽王彼申侯不過是此申伯之子與孫耳箋言改大其邑或亦褒進其爵矣王氏曰鄭語桓公曰謝西之九州何如史伯曰唯謝邠之間是易取也注曰謝申伯之國

今在南陽謝西有九州二千五百家爲州郊南謝北號鄩在焉
右曾案王逸楚辭章句引詩曰申伯番番既入于徐王符潛夫
論曰申在宛北序山之下故詩曰于邑于序徐序謝俱聲近字
易國語言齊許申呂由太姜然則申之始封其在周興之初其
後中絕宣王改封之謝以續先祀故曰疊疊申伯王續之事又
曰我圖爾居莫如南土申城今在南陽府南陽縣北二十里

申國在宛班固王符馬彪說並同

博物記亦云宛有申亭

而劉昭注續

志引荊州記曰棘陽縣東北百里有謝城水經泚水注曰謝
水出謝城北城周迴側水申伯之都也世祖封樊重少子爲
謝陽侯卽此舊棘陽縣治在西此別一謝城世本所云任姓
之謝或在此道元以爲申伯之都非是方輿紀要曰羅山縣

西北六十里有謝城申伯所都羅山漢酈縣地總與左傳以
申呂並言者不合

澆池

說文作澆沱

傳曰澆流貌箋曰池水之澤浸潤稻田豐鎬之閒水北流水經
注曰鄩水又北流西北注與澆池水合水出鄩池西而北流入
于鄩九域志曰京兆府有冰池十道志曰澆池亦名聖女泉右
曾案傳訓澆爲流不以爲池名也然晉書太元中苻秦將鄧景
率衆據澆池以擊姚萇則明爲池澤矣豐鎬之閒水北流者迫
于南山故也明一統志曰鄩水下流合澆池水澆池在西安府
城西北二十里西北合于鄩水

正義云池上引豐水又決而入豐非是

蘇州府志曰京水出蘇州府

又與而入海

于南山若也

蘇州府志曰京水

率來

蘇州府志曰京水

于南山若也

蘇州府志曰京水

皇清經解續編卷千四十二終

南菁書院

詩地理徵五

嘉定朱右曾亮甫著

大雅上

摯

傳曰摯國任姓箋曰摯國中女曰太任從殷商之畿內嫁於周

周語曰摯疇由太任注曰摯疇二國奚仲仲虺之後太任之家

唐書世系表曰祖已七世孫曰成徙國于摯仲虺居辭臣扈祖

已皆其胄裔傅氏曰自彼殷商來嫁于周則摯是殷畿內國右

曾案郡國志注曰汝南平輿有摯亭見說文平輿在今汝甯府

汝陽縣東南

京 京師

皇清經解續編

詩地理徵五

一

傳曰京大也王肅曰大國右曾案爾雅曰絕高爲之京則京本爲邱之高大者皇矣傳曰京大阜此其正訓也以其爲高大之阜借爲大義左傳曰莫之與京公劉篇曰京師之野傳曰是京乃大衆所宜居之也是也白虎通曰京師者千里之邑號也京大也師衆也天子所居故大衆言之春秋傳曰京師天子之居也夏曰夏邑殷曰商邑周曰京師風俗通義曰邱之絕高大者爲京今京兆京師義取于此據此知京師於名起於周實始於公劉之居豳其後世因以爲千里之邑號如皋門家土制於太王後世因以爲天子之制也此詩言曰嬪于京又言于周于京猶言周之京師耳

箋曰京周國之地小別名也

大京周地名文王但發其依居

京地之衆以往侵阮國之疆皇正義曰上篇述文王受命之事而云裸將于京可得以爲京師此王季時爲諸侯子孫追崇其號不得卽以其居爲京師也右曾案京爲周地本無可攷所以易傳者但以傳訓京爲大語不明了耳正義駁孫毓京師之說則有不然者果如疏言則公劉并未追王何以有京師之名詩詠太任曰嬪于京又曰京室之婦詠太姒則曰于周于京纘女維莘兩世婚娶必舍其國都止于京地此何義故也匪風詩念彼周京念彼京周亦以周京並言此又何義

也

洽陽

說文作郟穀梁桓八年傳注引亦作郟

傳曰洽水也陸氏釋文云焉邛有郟陽縣應劭云在郟水之陽

水經注曰郃陽城南有漢水東流注于河水南有文母廟有碑
去城十五里水卽郃水也括地志曰郃陽故城在同州河西縣
南三里郡縣志曰郃水在舊河西縣南五里今郃陽界內右晉
案史記魏文侯築合陽卽郃陽也明一統志曰郃陽縣在同州
東北百二十里郃水經縣北蓋縣非漢舊矣

文王初載天作之合傳曰載識合配也箋曰于文王生有所
識則爲之生配然則太姒少于文王二三歲矣大戴禮文王
世子篇云文王十三生伯邑考十五生武王發許慎五經異
義曰文王十五而生武王武王尙有兄伯邑考是太姒生伯
邑考纔十歲或十一歲耳小戴文王世子篇曰文王九十七
而終武王九十三而終則文王終時武王年已八十三矣管

蔡世家曰武王同母兄弟十人武王已克殷紂封功臣昆弟

康叔封聃季載皆少未得封謂之少年必在十五以下武王

年八十七而克殷此詩疏本鄭氏說也而有十五以下之母弟是太姒

之生康叔聃季爲八十餘歲矣鄭氏謂文王終之明年武王乃生成王而成王又有弟唐

叔是武王入十餘有子矣夫男子十六有爲人父之道女子十四有爲人

母之道此古今不易者也男子七十女子六十同藏無閒氣

化衰而慾絕也春秋之世人多恣慾故有國君十五生子者

大戴蓋本此以附會之耳周本紀曰古公少子季歷娶太任

生昌有聖瑞古公曰我世當有興者其在昌乎于是太伯虞

仲亡如荆蠻汲冢紀年武乙三十四年周公季歷來朝王賜

地三十里見御覽太丁十一年周公季歷伐翳徒之戎捷其三

大夫

見後漢書西羌傳注

自太丁十二年至紂之亡爲六十三三年參之

文王享國五十年武王十三年而伐紂則季歷薨於太丁十

一年矣討古公之薨文王必已屆在傅處師之歲故知其足

以興周古公薨年不可知

今紀年云武乙二十一年周公卽

以紀年推之武乙三十四年季歷朝王必始免喪則古公薨

在武乙三十一年也自武乙三十一年至太丁十一年凡

十六歲則文王嗣位年蓋二十餘矣詩曰文王嘉止大邦有

子傳曰嘉美也箋曰文王聞太妣之賢則美之曰大邦有子

女可以爲妃通檢傳箋俱不言時王季猶在白虎通嫁娶篇

曰人君及宗子父母沒自定娶者卑不主尊賤不主貴故自

定之也昏禮記曰親皆沒己躬命之詩云文定厥祥親迎于

渭此魯詩遺說尤足證文王嘉止不言王季之故孫毓之徒

始拘拘大戴說謂此時文王纔十四孺子耳王季尙在豈

得制定求昏之事穎達駁之謂文王之娶時實幼少但聖人

有作動爲模範此詩歌之大雅以爲正法主于文王之身不

復繫之父母呼是何言歟父在乎不得自專苟非瞽瞍之頑

何可不告而娶王季猶在而嘉止定祥造舟親迎一不稟命

於父豈所謂聖人大倫之至乎或曰如子之說何不以文王

初載爲文王卽位之初年曰是固有所不可也禮曰男子三

十而娶女二十而嫁合爲五十應大衍之數生萬物也春秋

穀梁傳曰男二十五繫女十五許嫁感陰陽也標梅卒章傳

曰三十之男二十之女禮未備則不待禮會而行之者所以

蕃育民人也毛意以梅落喻年衰由卒章推之則其實三兮
爲二十八丸之男二十八丸之女其實七分爲二十六七之男
十六七之女其未落宜據男年三十五女年十五與穀梁傳
合聖人定制議道自己二傳雖不言文王文王娶太妣其必
年二十五明矣男年二十五則女年應十五而太妣不然故
詩著文王初載天作之合兩言以明太妣之少于文王不過
二三歲耳所以然者以太妣雖過許嫁之年而其德賢淑故
又曰文王嘉止大邦有子也春秋文公三十二年公子遂如齊納
幣公羊傳曰納幣不書此何以書譏何譏爾譏喪娶也娶在
三年之外則何譏乎喪娶三年之內不圖婚文王嗣位之初
年父喪未畢安可圖婚圖婚必在即位三年矣書曰文王受

命惟中身厥享國五十年受命者受牧伯專征殷王之命也
中身者上壽百有二十半之則六十也周書文傳解曰文王
受命九年時惟莫春在鄘召太子發則尙書今文說文王受
命七年而崩者非也文王年二十二三而嗣位享國五十年
則崩年七十二三受命之年六十三四故曰惟中身舊解以
受命爲嗣位中身謂年四十七誤於戴記也逸周書柔武解
曰維王元祀大開武解云維王一祀小開武解云維王二祀
寶典及艷謀解並云維王三祀則尙書說謂武王冒文王受
命之年不改元者非也書序曰惟十有一年武王伐殷作泰
誓武王克殷以箕子歸作洪範洪範曰惟十有三祀王訪于
箕子蓋十一年觀兵十三年殺紂史記宋世家亦曰武王既

克殷訪問箕子明克殷在十三年周本紀又今文說謂九年

觀兵十一年殺紂者非也周書度邑解曰惟天不享於殷發

之未生于今六十年則武王受命之時年六十嗣位之年四

十有八以文王壽七十三計之則文王年二十六而生武王

也康叔聃季為太姒之少子太姒既少于文王二三歲則其

少子當文王崩時亦弱冠矣周書克殷解曰武王既位社南

衛叔傅禮能傅禮豈甚幼哉白虎通姓名篇曰文王十子管

蔡霍成康南南即聃季皆采也管蔡霍成封于武王則康南亦必

受之武王史記云幼未得封者非也善乎邵陽魏默深之言

曰語徵實東漢不如西漢西漢不如周秦可謂得治經之凡

者矣中興通志國五十五受命管蔡

莘

傳曰太姒之國世本曰莘姒姓禹後水經注曰郟陽城故有莘

邑唐世系表曰啟封支子于莘括地志曰古夔國在同州河西

縣南二十里右曾案史記閔天求有莘氏美女獻之于紂即此

周語曰杞繒由太姒然則莘國後絕改封杞繒二國矣河西故

城在今同州府郟陽縣東四十里

牧野說文作毋正義曰禮記及詩作晦野案晦乃毋之譌也

書曰王朝至于商郊牧野乃誓皇甫謐曰在朝歌南七十里郡

國志曰河南朝歌縣南有牧野水經注曰自朝歌以南暨清水

土地平衍據皋跨澤悉牧野之地通典曰衛州汲縣牧野之地

右曾案爾雅曰邑外謂之郊郊外謂之牧牧外謂之野鄭氏聘

禮注云天子畿內百里爲遠郊近郊半之白虎通亦云近郊五十里今牧野去朝歌七十里所謂郊外也

自土

地理志曰右扶風杜陽縣杜水南入渭詩曰自杜師古曰毛詩自土齊詩作自杜言公劉避狄而來居杜與沮漆之地右晉案土杜字通杜陽故城在今鳳翔府北九十里杜陽山杜水並在府東北祝穆方輿勝覽云隴州吳山縣東四十五里有文王城蓋卽漢之杜陽城又岐山縣東二十里亦有杜陽城非是

岐

傳曰踰梁山邑于岐山之下正義曰呂氏春秋云太王杖策而去邠人相連而從之遂成國于岐山之下書傳略說云太王去

邠過梁山邑岐山周人東脩奔而從之者三千乘一止而成三千戶之邑王氏曰地理志云右扶風美陽縣岐山在西北中水鄉周太王所邑皇甫謐云今美陽西北有岐城舊址水經注岐水歷周原下北則車承鄉成周聚水北卽岐山郡縣志云岐山亦名天柱山在鳳翔府岐山縣東北十里右晉案國語云周之興也鸞鷲鳴于岐山呂氏春秋岐山丸山之謂也漢美陽故城在今乾州武功縣西北又西北則岐山縣也

周原卽岐中水歷也周原又東合美水發美陽之中平里又

傳曰周原沮漆之間也箋曰廣平曰原周之原地在岐山之南郡國志曰右扶風美陽有岐山有周城周太王所徙南有周原皇甫謐曰邑乎周地始改國爲周通典曰美陽故城在京兆府

武功縣北七里郡縣志曰鳳翔府扶風縣本漢美陽縣地

高氏士奇曰括地志美陽城亦曰太王城亦曰周城寰宇記

曰周城一名美陽城皆誤也水經注云岐水逕周城南歷周

原其北則中水鄉成周聚又東合姜水逕美陽之中亭川又

東逕美陽故城注雍入渭據此則美陽周城截然二地矣周

城在岐山縣之東竟與武功之美陽城中開尚隔扶風一縣

漢時美陽竟甚廣扶風正美陽地故岐得在其西北安得混

為一地乎通典云美陽治中水鄉城西即中亭洲尤繆右曾

案高氏說是也但周城岐陽亦自有別闕宮篇云居岐之陽

誦文邑部邾周大王所封或作文王誤也在右扶風美陽中水鄉從

邑支聲杜預云岐陽在美陽縣西北與班志水經注昭台周

城周公之采地王禕周公廟記云周城今為岐陽鎮遺址猶

存廣袤七八里四圍皆深溝南有周原杜預曰周扶風雍縣

東北周城也雍縣即今鳳翔府治今岐山縣在府東五十里

其東竟於漢為美陽縣地其縣治以西於漢則雍縣地陝西

通志曰周城在岐山縣西北十五里是周公之采與太王所

邑周名則同城地則異方輿紀要云岐山縣東北至邠州百

二十里岐山在縣東北十里梁山在縣東北五十里東連乾

州界州故好時縣也括地志梁山在好時縣西北十八里扶風縣在府東百一十里東

至乾州武功縣五十里故辨地而命以方曰梁山在邠西南

岐周中水鄉在梁山南周公之采在岐周西少北蓋子曰肆

不殄厥愠亦不隕厥問文王也趙岐注曰言文王不殄絕賦

夷之愠怒亦不能隕失文王之善聲問也帝王世紀云文王受命四年周正月丙子混夷伐周三日王至周之東門是所謂不能殄絕吠夷之愠怒也又曰文王閉門修德不與戰是所謂不能隕失文王之善聲問也拔當如拔本塞原之拔柞械拔而行道成蹊混夷乃疾行逃遁維其困矣此言伐混夷之事也此章傳甚簡而箋又曲說支離不可通趙岐皇甫謐說或得毛惜詩山隰西華十五里與國公之與與大主謂虞東實與美為美國淵其淵當以

傳曰虞芮之君相與爭田久而不平乃相謂曰西伯仁人也盍往質焉乃相與朝周入其竟則耕者讓畔行者讓路入其邑男女異路斑白不提挈入其朝出讓為大夫大夫讓為卿二國之

君感而相謂曰我等小人不可以履君子之庭乃相讓以其所爭田為閒田而退郡縣志曰故虞城在陝州平陸縣東北五十里虞山之上古虞國閒原在平陸縣西六十五里即虞芮讓為閒田之所右曾案平陸縣今屬解州在州東南九十里閒原今名讓畔城

晉太康地記曰虞西百四十里有芮城郡縣志曰芮城在陝州芮城縣西二十里古芮國右曾案芮城縣今屬解州在州西南九十里

旱麓

傳曰旱山名也麓山足也王氏曰地理志曰漢中郡南鄭縣旱

山沱水所出東北入漢曹氏曰旱山在梁州之地與漢廣相近
 故取以興焉寰宇記曰旱山在南鄭縣西南二十里周地圖云
 山上有雲卽雨右曾案今漢中府南鄭縣西南六十五里有旱
 山熱濕西二十里古沔國古曾案南鄭縣今屬嶺南西南
 晉密須山曰旱西百四十里南鄭縣志曰旱山在沔
 傳曰國有密須氏侵阮遂往侵其王肅曰密須氏姁姓之國也
 呂氏春秋曰密須之民自縛其主而與文王地理志曰安定郡
 陰密縣詩密人國括地志曰陰密故城在涇州鶉觚縣西其東
 接縣城卽古密國郡縣志曰涇州靈臺縣西陰密故城卽古密
 國右曾案左傳曰密須之鼓文所以大蒐也謂伐密須氏所得
 之鼓也伏生書傳云文王受命曰年伐密須史記同鶉觚縣唐天

寶中改曰靈臺今隸平涼府陰密故城在縣西五十里靈臺縣南至鳳

翔府扶風縣二百里侯伯之職救患分戮討暴密也阮也其也皆文王之所謂友

邦素所帥之以事殷者也乃密人始亂侵阮徂其是不恭其

職而敢距周也釋此不討縱暴人而莫卹鄰患上違王命下

滋民疾此文王所以赫然震怒者也傳曰侵阮遂往侵其未

嘗以爲周地而王肅云不恭其職敢興兵相逆大國侵周地

述毛而非毛義所以誤者由下文有依其在京侵自阮疆陟
 我高岡無矢我陵云云夫我者內之之詞密卽不恭阮其既
 爲與國自必外密須而內阮其且使非國何以曰阮疆此欲
 闢鄭而不知所以闢鄭也鄭以阮徂其爲三國說本魯詩無

皇清經解卷之五
關經誼顧謂三國犯周文王伐之密須距義兵違正道正義
從而傳會之謂文王欲侵三國徵兵於密密人距而不從無
論徵兵之事卽如此說是兵端肇於三國而成於文王其不
然乎矣鄭意以密阮祖其皆紂之黨故首章箋曰殷崇之君
其行暴亂不得于天心密阮祖其之君又助之謀曾不思文
王帥殷之畔國以事紂何惡於紂乃顯然誅紂之黨與剪商
之謀臣其不然二矣以阮祖其侵周之故而徵兵於密以報
之於文當曰三國不恭侵阮祖其密距大邦王赫斯怒且果
如此則辱亡齒寒密人距周固無足怪何得以密爲首惡密
人又何以自縛其主以與周其不然三矣且史記大傳悉數
文王用兵之先後未聞其伐阮祖其孫毓所譏確不可易其

不然四矣穎達不惟不能匡其失又肆爲荒悖之語謂文王
伐混夷仍以天子之命命將帥則伐此三國之時叛殷之形
未著密須在其統內故得徵兵是穎達之所謂文王卽曹操
所自比之文王非孔子所稱至德之文王也非聖誣經不已
甚哉又稱皇甫謐云文王問太公吾用兵孰可太公曰密須
氏疑于我我可先伐之管叔曰不可其君天下之明君伐之
不義太公曰臣聞先王之伐也伐逆不伐順伐險不伐易文
王曰善遂侵阮祖其而伐密須密須之人自縛其君而歸文
王謐之此言蓋採摭戰國時遺說傳會成文不可依據且亦
與經背也密須姑姓文王滅之其後以封姬姓土地不異而
族姓則殊國語云密由伯姑韋昭疑文王滅密不由姑也攷

富辰所言鄩鄩聃息鄩廬諸邦皆周世所亡滅周語云恭王遊涇上密康公從有三女從之其後恭王滅密伯姞蓋卽三女之一韋昭所疑非也王氏引以證姞姓之密須疎矣

阮足利本
作邗

張氏曰阮國名在今涇州右曾案地理志安定郡有爰得縣爰重言之爲阮故城在今涇州東南於密須爲東北也

通志氏族略云阮商諸侯國在岐渭之間蓋探下岐陽渭將故有此說實無可攷也正義曰王肅云無阮徂共三國孔晁云周有阮徂共三國見于何書孫毓云文王七年五伐未聞有阮徂共張融駁之曰晁豈能具數此時諸侯而責徂共非國也魯詩之義以阮徂共皆爲國名是則出于舊說非鄭創

造攻後漢書伏湛傳曰文王受命征伐五國必先詢之同姓謀之羣臣云云五國謂密崇阮徂共也湛蓋本齊詩說則不獨魯詩以爲國矣毛公所以必訓徂爲往者以下徂旅孟子引作徂莒則旅明是地名非師旅之旅旅爲地名則徂必非國且以侵阮共爲密之舉旣順文義又可知文王視民如傷一怒安天下之全量此毛義之精所以高出齊魯也自王肅以爲周地而傳意晦矣

其

張氏曰涇州今有其池卽其也右曾案其池在今涇州北五里傳曰密人侵阮遂往侵其遂者繼事之詞明非一國張氏謂其爲阮國之地非是

旅孟子作莒

傳曰地名右曾案趙岐孟子注曰文王赫然斯怒于是整其師旅以遏止往伐莒者蓋本傳為說莒亦讀旅旅魯古同段借作鹵地理志安定有鹵縣也

韓非子有文王伐孟克莒舉鄆之語案此蓋別事不見於經今西安府三原縣有孟侯原清鄆原乾州有魯店疑是其處或據以證詩云旅為密地密孟字同未詳

鮮原毛音息淺反鄭讀仙善也

傳曰小山別大山曰鮮正義曰孫炎云別不相連也太王初遷已在岐山之陽此亦在岐山之陽去舊都不遠周書稱文王在程作程寤程典皇甫謐云文王徙宅于程蓋謂此也王氏曰地

理志右扶風安陵闕駟以為本周之程邑括地志云安陵故城在咸陽縣東二十一里周之程邑右曾案周書和寤解云王出圖商至于鮮原孔晁注曰近岐周之地小山曰鮮路史國名紀云在今咸陽與畢陌接所謂畢程程大昌雍錄云孟子言文王卒于畢鄆鄆即程也方輿紀要云唐咸陽故城在縣東二十里則安陵故城當在今咸陽縣東四十里也紀要云在縣東二十里此沿括地之文未攷其實與又云畢原在縣北五里亦謂之畢陌南北數十里東西二三百里即九峻諸山之麓也咸陽西北去岐山三百里而得謂之岐陽者蓋岐山迤邐東出盡於涇水隨地異名九峻谷口亦岐之支派也

崇

箋曰崇侯虎倡紂爲無道通典崇國在京兆府鄠縣右曾案周本紀云崇侯虎譖西伯于殷紂紂乃囚西伯于羑里閔天之徒乃求有莘氏美女驪戎之文馬有熊九駟因殷嬖臣費仲以獻紂乃赦西伯賜之弓矢斧鉞得征伐于是伐崇侯虎而作豐邑書大傳亦謂文王伐崇在受命六年皇極經世商受十八年西伯伐崇二十一年西伯薨文王有聲詩云旣伐于崇作邑于豐是崇卽豐也

羑里之難史記謂在未受命之前尙書今文說在受命五年今文說是也殷傳曰西伯得四友獻寶免于虎口而克耆大傳曰得三子獻寶紂釋文王而出伐黎鄭注書序本之云紂聞文王斷虞芮之訟後又三伐皆勝謂邢密須大夷而始畏惡之拘

于羑里紂得散宜生等所獻寶而釋文王文王釋而伐黎明年伐崇凡讒譖之行必有其端未專征伐文王不過恪恭侯職耳至三伐皆勝天下駸駸歸周崇侯知紂之畏惡之也故譖之曰西伯積善累德諸侯皆嚮之將不利于帝紂信之而囚西伯拘之羑里之庫百日以詩書傳記攷之受命四年周正月大戎侵周其年夏以紂命伐獫狁故詩曰昔我往矣黍稷方華秋移師伐大夷故詩曰嘒嘒草蟲趨趨阜螽赫赫南仲薄伐西戎至明年周四月師還故詩曰春日遲遲采芣祁祁執訊獲醜薄言還歸周四月殷三月也文王於是朝殷述職崇侯於是譖西伯紂於是囚之羑里故周書程典曰維三月旣生魄文王合六州之侯奉勤于商商王用宗讒宗當震作崇

怒無疆夫伐密而後遷程宅程而後作程典况比次其月又相昭合乎殷本紀據戰國策魯仲連說以成文但云西伯竊歎崇侯知之以告紂不言其譖周本紀載虎之譖詞而不言入爲三公脯鬼侯鄂侯之事蓋太史公馳騁古今兼采衆說傳聞異詞書以存疑互相出入原未爲定論也程典又云諸侯不娛逆諸文王文王弗忍乃作程典以命三忠逆謂文王既釋而逆之也弗忍者不忍從諸侯之請而正王位也夫湯釋於夏臺有鳴條之役文王出於羑里弗忍從諸侯之請此湯之所以有慙德而文之所以爲至德也箋疏乃據緯候以攷稱王之年不亦誣聖之甚哉

靈臺

傳曰神之精明者稱靈四方而高曰臺正義曰服虔左傳注云天子曰靈臺諸侯曰觀臺僖十五年左右傳云秦伯獲晉侯以歸舍諸靈臺杜預曰在京兆鄠縣周之故臺也王氏曰三輔黃圖云靈臺在長安西北四十里高二十丈周四百二十步三輔故事云在豐水東右曾案康志賀述禮統曰夏爲清臺商爲神臺周曰靈臺蓋自文王築臺名之曰靈後遂以爲天子之制如皋門冢土也括地志曰今辟雍靈沼悉無復處所惟靈臺孤立高二丈是臺至唐太宗時猶存也方輿紀要曰鄠城在西安府鄠縣東五里鄠宮又東二十五里卽靈囿之地中有靈臺五經異義稱公羊說天子有靈臺以觀天文有時臺以觀四時施化有囿臺觀鳥獸魚鼈諸侯有時臺囿臺皆在國之東南二十五里

東南少陽用事萬物著見用二十五里者吉行五十里朝行莫反也此靈臺在靈囿中未始不可觀四時及鳥獸但所云二十五里則相印合東亦少陽也

靈囿

傳曰囿所以域養禽獸也天子百里諸侯四十里正義曰解正禮耳其文王之囿則方七十里鄭駁異義云同言靈者于臺下爲囿沼則因臺爲名王氏曰黃圖云在長安縣西四十二里右曾案春秋正義曰天子曰苑諸侯曰囿然攷周禮囿人注曰謂天子小苑彼疏曰古謂之囿漢謂之苑是古者天子諸侯通曰囿也明一統志曰靈囿在鄠縣東三十里

靈沼

黃圖曰在長安西二十里右曾案玉海引水經注曰豐水北逕靈臺西文王引水爲辟離靈沼

辟離

傳曰水旋邱如璧曰辟離以節觀者黃圖曰辟離在長安西北四十里史記曰豐滂有天子辟池索隱云卽辟離右曾案五經異義稱韓詩說曰辟離者天子之學圓如璧壅之以水示圓言辟取璧有德不言辟水言辟離者取其離和也所以教天下春射秋饗尊事三老五更在南方七里之內白虎通曰天子立辟離何所以行禮樂宣德化也辟者璧也象璧圓以法天離者壅以水象教化流行也王制曰天子曰辟離諸侯曰泮宮詩訓曰水圓如璧

此蓋魯詩說

豐

地理志曰右扶風鄠縣豐水出東南北過上林苑入渭說文曰
鄠周文王所都在京兆杜陵西南皇甫謐曰豐在京兆府鄠縣
東豐水之西文王自程徙此孔氏曰從鮮原徙豐豐在岐山東
南三百餘里括地志曰豐宮在鄠縣東三十五里通典曰今京
兆府長安縣西北靈臺鄉豐水上朱子曰在京兆府鄠縣終南
山北右曾案郡國志注稱泱錄注曰豐鎬相去二十五里方輿
紀要曰在今鄠縣東五里

豐水

箋曰昔堯時洪水而豐水亦氾濫為害禹治之使入渭東注于
河禹之功也豐邑在豐水之西鎬京在豐水之東老子曰豐水

之深十仞而不受塵垢金鐵在中形見于外三輔黃圖曰出鄠
南山豐谷北入渭黃氏曰北至咸陽縣入渭郡縣志曰豐水出
京兆府鄠縣東南終南山北流逕縣東二十八里北流入渭右
曾案水經曰渭水又東豐水自南來注之注曰地說云渭水與
豐水會于短陰山內又長安志長安縣下引水經注曰豐水出
豐溪西北流分為二水一水東北流又北交水自東入焉又北
昆明池水注之又北逕靈臺西又北至石塢注于渭方輿紀要
曰豐水在西安府西三十里出鄠縣縣在府西
南七十里南山谷中漢志
注云原出秦嶺西北經子午谷又得豐谷口水故名焉東北流
逕故長安城西又北至咸陽縣縣在府西北五十里
水在縣東南三里入渭
大雅下

有郃

傳曰郃姜嫄之國也堯見天因郃而生后稷故國后稷于郃命使祀天以顯神順天命耳箋曰后稷成功堯改封于郃就其成國之家室正義曰世本云有郃氏女曰姜嫄此郃爲后稷之母家所以得封后稷者或時君滅絕或遷之他所也王氏曰郡國志云右扶風郿縣有郃亭郡縣志曰故釐城一名武功城在京兆府武功縣西南二十二里古郃國也秦孝公作四十一縣釐武功各其一武功蓋在渭水南今郿縣地右晉案地理志曰右扶風釐縣后稷所封後漢省釐入郿故主恠傳曰宿郿之釐亭晉移武功縣治釐城故杜預曰始平武功縣所治釐城古郃國今武功縣隸乾州卽唐縣也

百泉 流泉

郡縣志曰邠州三水縣以縣界有羅川谷三泉並流故以爲號幽城在縣西高泉山亦曰甘泉在永壽縣北二十五里右晉案通鑑注三水縣有龍泉鎮金史地理志三水縣有清泉鎮方輿紀要三水縣在邠州東北七十里縣東二里有玉泉縣南三里爲梢泉自高山湧出縣北爲白馬泉合流爲一亦名汎水永壽縣西北至邠州七十里高泉山莫谷水原焉本名安陽泉

曹氏曰漢朝那縣屬安定郡隋改爲百泉縣屬平涼郡魏于

其地置原州唐因之百泉溥原卽其處案唐原州今爲平涼

府東距邠州三百里又今涇州西三十五里有百泉

州一百泉眼極多四時不涸距幽已遠疑非詩所詠也

溥原 隰原

孔氏曰禹貢雍州原隰底績公劉居豳度其隰原以治田是豳居原隰之野史記正義曰原隰豳州地也郡縣志曰五龍原在新平縣南三里原側有五泉水因名永壽縣有永壽原宜祿縣有淺水原右曾案寰宇記邠州理新平縣縣東北有白土原其東又有陳陽原

涉渭

史記周本紀曰公劉自漆沮渡渭取材用正義曰從漆縣漆水南渡渭水至南山取材木為用漆水東入渭

皇澗

傳曰皇澗名也正義曰皇澗縱在兩傍而夾之右曾案寰宇記

甯州真甯縣大陵水下引水經注大陵小陵水出巡河南殊川西南逕甯陽城故豳詩曰夾其皇澗陵水即皇澗也案方輿紀要甯州南至邠州百四十三里正甯縣在甯州東百里縣南有大陵小陵水即九龍川之上源九龍川在州東百二十里一名九陵川自橫嶺流至州西南合奢延川又南流入涇蓋古讀皇橫相似水出橫嶺故曰皇澗今經三水縣北而入涇也

過澗

傳曰過澗名也正義曰過澗橫故在北而嚮之

芮鞫

周禮注作芮坻地理志注韓詩作芮坵案說文無坵字當作坵

傳曰芮水厓也鞫究也箋曰芮之言內也水之內曰隩水之外曰鞫正義曰鞫是水厓之名言其曲水窮盡之處也爾雅厓內

皇清經解總編
爲隩外爲鞠李巡曰厓內近水爲隩其外爲鞠孫炎曰內曲裏也外曲表也右曾案傳箋之意蓋主過澗而言內則澗之北外則澗之南也

夏官職方氏雍州其川涇芮注云汭在豳地詩大雅公劉曰汭坻之卽地理志曰右扶風汭縣芮水出西北東入涇詩芮矣蘇氏曰芮鞠芮水之外也朱子曰芮水名出吳山西北東入涇胡氏曰涇屬渭汭傳曰水北曰汭春秋傳注曰水之隈曲曰汭說文汭水相入也蓋兩水相入其水會襟帶處必有隈曲涇水東南流至邠州長武縣東芮水自平涼府靈臺縣界流逕縣南而東注于涇公劉所居故豳城正在二水相會

內曲之處及其後人衆則又營其外曲以居此皆本韓詩爲說今攷汭水源流隋志安定郡華亭縣有汭水通典邠州宜祿縣有汭水郡縣志涇州良原縣汭水一名宜祿川西自隴州華亭縣流入寰宇記引水經注曰芮水出小隴山其川名

汭

隴州汭源縣芮水又東逕宜祿縣俗謂之宜祿川水邠州宜祿縣通典亦

引方輿紀要芮水出鳳翔府隴州西四十里弦蒲藪東北流

入平涼府華亭縣南又東北逕崇信縣北至涇州城北又東南過長武縣北而東流合于涇水是也但公劉崎嶇戎狄立國豳谷竟必不廣且豳城在涇水東汭水在涇水西詩不言涇豈得越涇而居芮此毛傳之精所以勝於韓詩也

凡

箋曰凡伯周同姓周公之胤也入爲王卿士正義曰左傳云凡
蔣邢茅胙祭周公之胤也世在王朝蓋畿內之國杜預曰汲郡
共縣東南有凡城共縣于漢屬河內郡王氏曰郡縣志云故凡
城在衛州共城縣西二十里古凡伯國右曾案郡國志曰河內
共縣有汎亭劉昭注曰凡伯邑水經注曰在共縣西南今衛輝
府輝縣西南二十里凡城是也

通典云在衛州
黎陽縣北非是

鬼方

傳曰遠方也正義曰易既濟九三高宗伐鬼方三年乃克象曰
憊也言疲憊而後克之明鬼方是遠國也王氏曰漢書匡衡傳
云成湯化異俗懷鬼方大戴禮帝繫曰陸終氏娶于鬼方氏漢
五行志注曰鬼方絕遠之地一曰國名後漢書西羌傳曰武丁

征西戎鬼方竹書紀年曰周公季歷伐西落鬼戎文選注世本
注並云鬼方于漢則先零戎是也右曾案地理志曰金城郡臨
羌縣西北塞外有僊海鹽池水經注曰龍夷城故西零之地十
三州志曰城在臨羌新縣西三百一十里西零卽先零今青海
也詩經類考曰今貴州有羅鬼夷未詳

芮

箋曰芮伯畿內諸侯王卿士也字良夫正義曰書序云巢伯來
朝芮伯作旅巢命武王時也顧命同召六卿芮伯在焉成王時
也桓九年王使虢仲芮伯伐曲沃桓王時也此又厲王之時世
在王朝常爲卿士書敘注云芮伯周同姓國杜預云芮國在馮
翊臨晉縣則在西都畿內也王氏曰地理志曰左馮翊臨晉縣

皇清經義卷之五
三
芮鄉故芮國通典云同州馮翊縣古芮國右曾案今同州府朝
邑縣有南芮鄉北芮鄉

仍

箋曰仍叔周大夫也右曾案畢沅曰古仍任通用春秋桓五年
仍叔穀梁作任叔左傳曰夏桀爲仍之會又曰有仍氏生女是
仍古國名又昭二十二年傳曰王師軍于任人則其地在洛陽
也

嶽

傳曰嶽四嶽也東嶽岱南嶽衡西嶽華北嶽恆堯之時姜氏爲
四伯掌四嶽之祀述諸侯之職于周則有甫有申有齊有許也
箋曰四嶽主方嶽巡狩之事在堯時姜姓爲之歷虞夏商世有

國土周之甫也申也許也齊也皆其苗胄正義曰風俗通云泰
山山之尊一曰岱宗岱始也宗長也萬物之始陰陽交代故爲
五嶽長衡山一名霍言萬物霍然大也華變也萬物成變由于
西方也恆常也萬物伏北方有常也右曾案岱在今泰安府泰
安縣北衡在今衡州府衡陽縣北華在今華州華陰縣南恆在
今定州曲陽縣西北周語曰其工之從孫四岳佐禹腓四岳國
命以侯伯賜姓曰姜氏曰有呂鄭語曰姜伯夷之後也伯夷能
禮于神以佐堯者也蓋堯之初四岳義和爲之義和死伯夷以
秩宗代之未知其爲何岳也舜咨四岳以命秩宗明是時四岳
猶義和爲之

鄒

傳曰郿地名箋曰時王蓋省岐周故于郿云正義曰郿于漢屬右扶風在鎬京之西申在鎬京之東南自鎬還申塗不經郿時蓋自岐遣之故餞之于郿曹氏曰先王之廟在岐周申伯受封則策命于先王之廟故王在岐而飲餞于郿江漢言召虎之封亦曰于周受命郡縣志曰郿本秦縣今縣東十五里有故城今周天和元年築在渭水南南當斜谷右曾案今郿縣在鳳翔府東南百四十里故城在東北渭水之北自岐周言之則在其南少東也

樊

傳曰仲山甫樊侯也正義曰周語樊仲山甫諫宣王韋昭云食采于樊左傳晉文公定襄王王賜之樊邑則樊在東都畿內也王氏曰左傳注云樊一曰陽樊野王縣西南有陽城右曾案在

今懷慶府濟源縣東南三十八里

韓

傳曰韓之先祖武王之子也水經注曰聖水逕方城縣故城北又東南逕韓城東詩溥彼韓城燕師所完王錫韓侯其追其貊奄受北國王肅曰今涿郡方城縣有韓侯城世謂寒號城非也魏書地形志曰范陽郡方城縣有韓侯城括地志曰方城故城在幽州固安縣南十里李氏曰溥彼韓城燕師所完涿郡乃燕地也右曾案顧氏日知錄曰其追其貊乃東北之夷而蹶父之靡國不到亦謂韓土在北陲之遠王符潛夫論曰昔周宣王時有韓侯其國近燕故詩云普彼韓城燕師所完韓西亦姓韓爲衛滿所伐遷居海中漢時去古未遠當有傳授固安縣今屬順

天府

詩之韓與左傳韓原之韓異而俱與今陝西之韓城縣無涉
 詩之韓國左傳所謂邗晉應韓武之穆也國語所謂武王之
 子應韓不在其在晉乎國在職方并州其後在漢有辰韓馬
 韓之屬謂之三韓韓原之韓左傳所謂霍楊韓魏皆姬姓也
 而晉滅之地理志所謂韓武子食采于韓郡國志所謂河東
 郡河北縣有韓城杜預所謂韓國在河東郡界也國在職方
 冀州滅于晉武公左傳云武獻以下兼國多矣又桓三年傳武公伐翼韓萬御戎萬即武子也則滅韓
 在此自鄭氏箋詩誤以晉之梁山為韓之梁山韋昭解國語
 誤以宣王命韓侯為即晉所滅之韓於是輻輳糾紛張華博
 物志遂云夏陽有韓原韓武子采邑隋世因之置韓城縣而

說地者罔不以為據豈知案之經傳不可通邪以詩言之其
 辨有四茫茫禹迹畫為九州封九山決九川破九澤越九原
 九州之內誰非禹甸古公踰梁山在好時矣爾雅梁山之犀
 象在南方矣莊子之呂梁在彭城矣漢書梁孝王傳梁山在
 東平矣禹貢呂梁在離石矣此皆章章經史者其餘不可悉
 數不得謂夏陽之梁山為禹所甸幽并無梁山即有之非禹
 所甸也辨一也晉都絳邑而云甸侯若韓在河東與晉鄰比
 當亦甸侯芮居臨晉而云圻內若韓在夏陽與芮接壤應云
 畿內而詩云因是百蠻傳曰長是蠻服之百國何哉以曹為
 伯甸去王城八百里例之則蠻服應去宗周三千四百里即
 每服二百五十里計之侯甸男采衛蠻六服一千五百里其非
 里宗周圻內八百里半之為四百里亦須一千九百里其非

河東夏陽明矣辨二也韓侯出祖出宿于屠說文郟在馮翊
郟陽郟陽距韓城不盈百里距河北縣不盈二百里而去鎬
京則三百里而遙韓侯已反國及郊顯父猶追餞之乎辨三
也春秋梁山伯國在韓城縣南二十里梁山梁之所以名也僖
公十九年梁亡入秦謂之少梁文公十年晉人伐秦取少梁
而梁山入晉爾雅作於春秋之末故云梁山晉望也括地志
曰韓城在同州韓城縣西十八里夫準之周禮韓侯爵封當
四百里梁山伯爵封當三百里乃今二國之都相距數里卽滕
鄆小國猶不至此可信乎不可信乎地理志明云左馮翊夏
陽故少梁秦惠文王更名梁山在西北無故韓國之說也辨
四也若夫追貊北國非夏陽之所接燕去同州二千餘里非

量地任力之法則亭林已詳哉言之矣以左傳言之其辨亦
有四晉之兼并載于傳者閔元年滅耿霍魏僖五年滅虢虞
其荀賈焦楊韓不知何年并於晉僖十五年傳言惠公許秦
賂河外列城五東盡虢略南及華山內及解梁城河外者南
河之外也觀僖三十年傳許君焦瑕及華山虢略可見若此
時晉已有河西何不以河西地予秦而韓萬見于桓三年傳
則韓之入晉久矣辨一也釋例韓韓原宗邱三名一地集解
宗邱近在宗邑則非河西地可知辨二也傳敘韓原之戰上
言涉河下言寇深則非河西地又可知辨三也晉語敘戰韓
之後云穆公歸至于王城王城在今同州府朝邑縣東又東
與山西蒲州府以河爲界則知左傳涉河卽朝邑之河所謂

蒲津關者也朝邑在同州府東三十里韓城在同州府東北
二百二十里若戰于韓城則秦師之歸當取道澄城不至朝
邑其辨四也是則韓城之韓無與于毛詩左傳明矣或曰是
則然矣然鄭氏韋昭杜預之倫咸以晉所滅者即武穆之裔
則安知詩之韓國不在河東彼夏陽之梁山或跨河而有之
未可知也曰茲所謂惑者矣武王光宅天下兄弟之國十有
五人同姓之國四十人豈能悉數之乎且燕分南北號有東
西徐別隗嬴越殊芊姒則何以必其無二韓也河東爲同姓
之韓封自武王涿郡爲武穆之韓封于成王惟成王之世侯
甸已無閒壤故國唐叔於太原疆以戎索封武穆於并域因
時百蠻詩曰纘戎祖考又曰先祖受命親昵之詞不殊命文

侯之昭乃顯祖也同姓之韓滅於晉春秋之韓氏六國之韓

王其裔也史記韓世家曰韓之先與周同姓姓姬氏其後苗

裔事晉得封于韓原曰韓武子

索隱曰系本及左傳舊說皆謂韓萬是曲沃桓叔之子晉

之支庶國語宣子謝叔向曰自桓叔以下嘉吾子之賜亦言桓叔是韓之祖也今以韓侯之後別有桓叔非關曲沃之桓叔右曾案晉世家云三晉滅晉靜公遷爲家人使河東爲武晉絕不祀如韓是曲沃之裔則晉祀猶未絕也

穆所封太史公不應於吉甫所詠富辰所言概置不道而但

據叔侯一語明爲同姓此可見毛傳史記相爲表裏西漢人

之聞見大抵相同矣且河北縣於詩爲魏國十畝之間已傷

陘隘魏侯逼處安得川澤訐訐而大麇鹿嘯嘯而多夏陽渡

河爲河津滎河二縣河津則耿國所處滎河乃魏之睢地韓

安得越之而有梁山哉至若燕師北國追貊百蠻之窒礙者

河北與夏陽同也實事求是自不得違王肅而從鄭氏矣
梁山

右曾案顧氏曰史記燕世家易水東分爲梁門水經注亦云灤水逕良鄉縣之北界歷梁山南高粱水出焉是所謂奕奕梁山者矣方輿紀要曰良鄉故城在涿州北四十里房山縣本良鄉縣地高粱河在昌平州西

魏劉靖造戾陵遏碑云登梁山以觀源流

地理志左馮翊夏陽梁山在西北括地志在同州韓城縣東南十九里薛氏禹貢解曰梁山在同州韓城縣而乾州好時縣亦有梁山在邠岐間非禹貢之梁山曹氏曰禹治水自壺口循梁山而西九域志在龍門南案辨已見上

屠

說文云郟左馮翊郟陽亭李氏曰同州屠谷王氏曰今日茶谷右曾案方輿紀要曰茶峪渡在同州郟陽縣東河西故城南南去罍浮渡里許通山西榮河縣界

汾王

傳曰汾大也箋曰厲王也厲王流于彘在汾水之上故時人因以號之猶言宮郊公黎比公也正義曰釋詁云墳大也墳汾音同王肅云大王王之尊稱也肅雖申毛傳其意亦爲厲王以宣王之前唯厲王耳彘於漢河東永安縣也西臨汾水郡縣志曰汾水逕霍邑縣西二里周厲王陵在縣東北二十五里右曾案霍邑縣今平陽府霍州也厲王葬汾水旁故曰汾王猶楚之若敖訾敖也

燕

王肅曰北燕國地理志曰廣陽國薊縣故燕國召公所封括地志曰燕山在幽州漁陽縣東南六十里國都城記云地在燕山之野故國取名焉曹氏曰武王子初封于韓其時召康公封于北燕實爲司空王命以燕衆城之右曾案古薊縣在今順天府治東偏自府西南至固安縣百二十里韓詩云薊大也箋訓燕爲安言古平安時衆民之所築完夫列國之城誰非築於平安之世何足爲韓異近人或言康公城韓猶穆公城謝未嘗不役本國之人特以召公統之故旗幟官司一以燕爲號信如此言則烝民何不云樊師徂齊黍苗何不云肅肅謝功召師營之乎謝功召師營之乎

百蠻

傳曰長是蠻服之百國也右曾案周制王畿之外有九服蠻服其第六服也賈公彥曰蠻者縻也以近夷狄縻繫之以政教自此以上六服是中國之九州也王制州建二百一十國通率六服凡有一千六百八十國每服有二百七十餘國以四約之爲六十七國有奇言百蠻舉成數也因是蠻服而爲之長言韓之先祖有德受侯伯之命也今西安府距京師二千六百五十里古里短今里長故數不同也

箋曰州界外接蠻服因見使時節百蠻貢獻之往來鄭意以韓在夏陽不可謂之蠻服百蠻卽下文追貊故云爾也但皋陶謨云外薄四海咸建五長曲禮云其在東夷北狄西戎南

蠻雖大日子則蠻夷自有君長侯伯主治州內豈得爲彼之
長因見使時節百蠻漢之邊郡太守蓋如此若以中國官司
主領蠻夷於漢則戎已校尉護羌校尉之例非毛帽亦非鄭
意也疏乃強而合之謂蠻服者蠻夷之在服中于周禮則夷
服鎮服雖自有長而來則由于中國其時節早晚執贄多少
之宜皆請于州牧故稱長是其述毛乃強毛以從鄭也又曰
來則使人致之于王往則使人送之返國制其貢獻之數爲
其來去之節是其述鄭又以漢之戎已校尉護羌校尉實之
恐亦非鄭意耳

追貊

傳曰戎狄國箋曰其後追也貊也爲獾狃所逼稍稍東遷正義

曰職方掌四夷九貉鄭志答趙商曰九貉卽九夷也又秋官貉
隸注云征東北夷所獲是貊者東夷之種而分居于北故爲韓
侯所統至于漢氏之初其種皆在東北于并州之北無復貊種
王氏曰說文貉北方豸種也孔氏云貉之爲言惡也爾雅疏云
狄類滅貊漢高祖四年北貉燕人來致梟騎助漢師古曰貉在
東北方三韓之屬皆貉類也後漢傳有貊耳小水貊滅貊之類
東夷之貊也右曾案周書王會解曰周頭輝茲輝茲者羊也孔
晁注曰周頭海東地名蓋卽追也又曰穢人前兒前兒若獼猴
立行聲似小兒注曰穢韓穢東夷別種山海經曰貊國在漢水
東北地近于燕漢書元朔元年東夷歲君南閭等降置蒼海郡
服虔曰穢貊在辰韓北高句驪沃沮之南東窮大海晉書東夷

傳夫餘國在元菟北千餘里有穢城本穢貊之城也是所謂貊也計周時追貊當在今宣化府以東北塞外故漢初貉與燕人來獻馬後漸東徙而韓侯之裔亦已爲貊矣

北國國與東夷之裔亦已爲貊矣
箋曰北面之國正義曰職方氏正北曰并州言受王畿北面之國當是并州牧也右曾案并州山鎮恆山澤藪昭餘祁川虜池嘔夷浸淶易則自今山西太原府以東至直隸順天正定之竟皆古并州之域固安韓城正是其處而夏陽河北之謬益可知矣

淮夷

傳曰淮夷東國在淮浦而夷行也正義曰禹貢徐州淮夷蠙珠

春秋時淮夷病杞齊桓公會于淮以謀之左傳謂之東路是在東國昭四年楚子會諸侯于申而淮夷與焉是淮夷爲國號大別之南漢與江合漢書地理志大別在廬江安豐縣則在揚州之竟江自廬江東北流順之而行將至淮夷乃北行嚮之也如此則召公伐淮夷當在淮水之南魯僖所伐淮夷應在淮水之北當淮之南北皆有夷也王氏曰後漢東夷傳殷武乙衰傲東夷浸盛遂分遷淮岱漸居東土周公征之遂定東夷厲王無道淮夷入寇王命虢仲征之不克宣王復命召公伐而平之陳氏曰江漢之許王命召虎是淮南之夷也率彼淮浦省此徐土是淮北之夷也呂氏曰會江漢諸侯之師以伐之嚴氏曰江漢之許指江北接淮南之地又曰淮夷最難服從化則後孚倡亂則

先動周人經理淮夷用力最多成王初年淮夷同三監叛其後
又同奄國叛伯禽就封又同徐戎以叛至厲王之時四夷交侵
宣王一命吉甫北方旋定繼命方叔伐蠻荆其後又命召穆公
平淮南之夷又命皇父平淮北之夷蓋南方之役至再至三江
漢常武所以爲宣王之終事也李氏曰觀費誓是淮夷世爲魯
患右曾案周書曰二叔及殷東徐奄及熊盈以畔又曰凡所征
熊盈族十有七國書序曰武王崩三監及淮夷叛周公相成王
將黜殷作大誥成王東伐淮夷遂踐奄作成王征成王旣黜殷
命滅淮夷還歸在豐作周官然則熊盈其卽淮夷乎成王踐奄
滅淮夷而後封伯禽費誓曰徂茲淮夷徐戎並興蓋成王翦滅
之餘至此又蠢動也淮南之邑召穆公平之春秋昭四年會楚
于申亦此夷也淮北之夷南仲及皇父征之魯頌曰淮夷攸服
春秋僖十三年會于鹹淮夷病杞故十九年宋公用鄆子欲以
屬東夷昭二十七年傳季氏得其民淮夷與之亦此夷也蓋自
今江蘇揚州淮安以北沿海之地至山東沂州青州之東皆古
淮夷所錯處也

程

傳曰程伯休父始命爲大司馬楚語曰重黎氏世敘天地其在
周程伯休父其後也當宣王時失其官守而爲司馬氏郡國志
曰雒陽有上程聚古程伯休父之國右曾案在今河南府洛陽
縣

淮浦 淮濱

皇清經解續編
傳曰浦涯也濱涯說文曰浦水瀕也李巡曰墳謂厓岸狀如墳
墓右曾案淮浦地漢立縣屬臨淮郡今爲淮安府安東縣淮水
經縣南東入海淮濱卽淮浦也

徐土 徐方

正義曰徐土當謂徐州之地曹氏曰禹貢徐州東至海北至岱
南及淮其地廣人衆矣若淮夷則東夷之種散處淮浦者爾此
先伐淮夷次征徐國蓋先其小而易者後其大而難者陳氏曰
徐大而淮夷小淮夷卽徐州之夷而服屬於徐曰徐方者兼徐
淮而言之曰徐國者特言徐戎也右曾案周無徐州青州卽徐
州之地此言淮北之夷而云徐土徐方者主徐國而言猶言三
齊三楚也淮夷從徐爲亂故率彼淮浦省此徐土卽所以震驚
徐方淮夷旣殄而徐自孤立無援矣

徐國 吳城 臨淮 興定

地理志曰臨淮郡徐縣故國盈姓王氏曰伯益佐禹有功封其
子若木于徐郡縣志曰大徐城在泗州徐城縣北三十里徐子
國淮水西南自虹縣界流入今徐城省爲鎮入臨淮右曾案左傳疏賈逵

曰徐卽淮夷服虔曰于云魯公所伐徐戎也路史柏翳子若木
事夏後有費昌爲湯御費仲事紂其立于淮者爲嬴氏夏世有
調王命以徐伯主淮夷周初僭稱王又曰自若木至偃王三十
二世爲穆王所滅後復封其子宗爲徐子魯昭公三十年吳滅
之夫徐城今在泗州東南

段氏據說文魯東有邾城邾爲徐之或體魯世家頃公十九

皇清經解續編
年楚伐我取徐州徐廣謂徐州在魯東索隱云說文邾邾之
下邑在魯東則徐戎與魯擊橈相聞故曰東郊不開案春秋
築臺于薛薛邾聲轉字易在周初於此容或有戎若徐國則
斷在臨淮不在魯東也林氏曰周文武興于西土化行于南
事故西南夷最先服牧野之戰庸蜀羌髳微盧彭濮已皆從征
及成王卽政天下已平矣然東夷徐奄猶興兵以叛故徐雖
伯翳之後而俗染于夷一叛于三監流言之日再叛于伯禽
撫封之時至穆王稍有荒淫而偃王者遽爾僭號洎宣王撥
亂而釋騷于南國者又徐也及徐微弱而東南之鳴張僭竊
荆楚吳越相繼興矣

皇清經解續編卷千四十三終



仁和葉維幹校
上海范本禮校

